

東
華
續
錄

東華續錄

同治十二

臣王先謙敬編

臣張式恭恭校

八月辛亥朔諭內閣慶端奏查明克復天台甯海情形並民團攻克新昌縣城一摺浙江天台甯海兩城於上年十月間相繼失陷天台縣知縣王興杞赴鄉集團馳往迎勦殲斃多人本年正月間官軍會集鄉團分隊繞至該縣東門焚燒賊營把總宋慶彪帶兵繼至合力夾擊先後斃匪約以萬計立將天台縣城收復已革護甯海營參將蘇方拱糾集鄉團會同道員蘇鏡蓉所派勇團分路進攻殺賊無算當將甯海縣城克復新昌踞匪經紳團疊次擊敗竄至黃宅鎮焚掠甯波等處潰匪復竄城內本年四月間王興杞督率團勇三萬餘人越境助勦與新昌民團合攻縣城當將東門

轟破我軍奮勇殺入克復新昌縣城復將黃宅鎮踞匪擒斬數百名餘匪奪命奔逃天台等處民團協同官軍殺賊連克數城實屬義勇可嘉所有出力紳團並陣亡勇丁著左宗棠彙案奏請獎卹○諭議政王軍機大臣等鄭元善奏回省日期並洪貞謙督兵追剿粵匪又酌調副將楊長春駐紮陳州一摺南陽敗匪分竄鎮平安皋等處勢已窮蹙惟副將王佐臣參將盧得勝等軍事無統屬恐不免推諉遷延該撫派署臬司洪貞謙馳赴宛郡督率調遣卽著飭令該員剋日出省嚴督各軍將此股窮寇悉數殲除無畱餘孽儻敢遲延不進縱匪他竄卽將洪貞謙嚴參治罪楊長春所部四營卽飭令迅速前進駐紮陳郡以剿爲防俟僧格林沁督兵大舉進擣擒巢該員卽就近聽候調遣黃贊湯雖已簡放廣東巡撫惟秋汛爲日正長中河上南見在險工疊出仍著駐工認真辦

理俟險工平穩以後再行來京請訓將此由五百里諭令知之○諭成明奏渡河獲勝並哨弁攜帶回匪訴呈來營稟報各摺片據稱督隊渡河適回匪在朝邑縣北關滋擾侍衛阜成等率馬隊迎擊該匪往西北敗竄護軍校明詳等巡哨在洛河北岸見有二回匪覓水過河手捧訴呈哀憐稟告各等語回匪性情狡詐所稟各情殊難憑信疊據瑛榮等奏報回匪攻撲省城協領圖克唐阿等力戰陣亡該逆佯爲不知但稱械鬪前副都御史張芾往油房街安撫回匪竟被拘畱據陝紳李應選等呈稱業已被害而該逆則稱張芾勸諭漢人不知所之察其情詞殊多閃爍顯係大兵將至藉詞以緩我師第成明所部兵力不厚未便遽行深入自應在同朝一帶扼要駐紮回匪既有稟訴卽乘機再行出示曉諭令其聽候勝保到陝查辦不准焚掠以示羈縻庶該回匪仍在附近州縣

殘殺卽著成羽督飭將領隨時援剿毋得以匪勢鴟張不敷調撥等詞藉端推諉勝保計已統帶大隊馳入潼關著卽相機前進大張撻伐將圍撲省垣逆壘悉數蕩平懾以兵威再行察看辦理不可以該逆悔罪投誠輕議招撫轉致墮其奸計貽患將來將此由六百里各諭令知之○諭慶端奏天台等處克復並剿辦沙縣等邑土匪各摺片見在新昌旣克自可進取紹興慶端已飭知縣王興杞激勵民團會同紹郡紳團迅圖克復卽著相機妥辦侍逆李侍賢經左宗棠擊敗後以金華爲巢穴該撫旣從龍游進剿賊勢必併力抗拒正可乘此空虚之時迅克紹郡斷賊左臂以爲進圖杭城地步處郡尙未克復並著剋期進攻毋稍延緩沙縣等處土匪勢頗蔓延急應添派兵勇迅圖殲除斷不准任其遷延致成巨患慶端本係革職暫畱本任之員自到浦城後僅據克復溫處各

屬城池數處其餘均係民團之力並無奇功足錄昨復授以杭州將軍耆齡到閩節節遷延本有革職畱任處分昨復畀以總督重任此係朝廷格外殊恩冀其感愧思奮該將軍等務當益加勉勵用副期望毋謂寬典之可屢邀也將此由五百里各諭令知之○以浙江台州集團禦賊免臨海等六縣兩年額賦○壬子諭內閣前因京師時疫未除諭令在京問刑各衙門趕緊清楚庶獄次第結案見在星變頻仍上蒼垂儆弭災之法尤重恤刑允宜格外推恩以承天戒除上年十月初九日恩詔以前軍流以下各犯業經分別飭部減等外其自咸豐十一年十月初九日恩詔以後至本年奉旨之日止著刑部將見審各案所擬軍流以下等罪官常各犯無論已結未結曾否發配均著照舊章一併分別奏請減等其步軍統領衙門順天府五城及各直省督撫將軍都統等均

著遵照刑部奏定章程一體查辦以清庶獄而返祥和○諭軍興以來需餉浩繁各直省捐輸抽釐藉資民力實係朝廷萬不得已之舉疊經諭令各督撫嚴禁科勒並將捐輸名目及抽釐各局酌量裁減各該督撫大吏宜如何仰體朝廷子惠黎元之意加意撫循痛除積弊以期康濟時艱乃本日據協辦大學士倭仁奏臚陳河南省官民情形內稱該省州縣誅求無厭錢漕之浮收雜派之訛索日增日盛其捐輸抽釐等項雖至零星小戶偏索無遺胥役劣紳從中私飽似此情形小民何以堪之因思各直省州縣積習相沿潔己奉公殊難其選此等藉端苛勒朘削小民者恐不乏人各該督撫等平日果能正己率屬廉潔自持斷不能爲屬員挾制亦何至任令不肖官吏浮收雜派罔恤民瘼用特申諭各直省督撫於所屬州縣嗣後務當實力痛除前弊如有貪鄙地方官藉捐

輸抽釐名目加徵勒派中飽私囊一經查出卽著嚴參治罪該督撫等亦當廉隅自飭痛絕苞苴以期大法小廉各盡厥職用副朝廷澄敘官方撫綏黎庶至意○李鴻章奏七月十二日副將華爾以輪船駛進青浦縣城河安放大礮轟倒城垛數處副將程學啟率開字三營滕嗣武率林字兩營分門攻擊賊匪不敢接仗全退入城當毀北門外賊卡兩座東門外賊卡一座十三日華爾復由南門率勇攻城城上槍礮甚密勇目被傷數十名又自松江添調常勝軍五百名於十五日由南門進攻城程學啟滕嗣武各出八成隊伍分攻東北兩門賊由北門出戰經開字營攔擊退回城中參將劉士奇等帶隊在西北兩門六里外分投設伏華爾將南門城牆轟裂十餘丈督勇冒煙撲上我軍一擁而進賊由西北兩門奪路逃竄立將青浦縣城克復程學啟等揮兵截殺兩路伏兵齊出

追逐數十里生擒逆匪四百餘名城及沿途殺斃溺斃者三四千名署提臣黃翼升親帶礮船前往布置暫令程學啟移師入城妥籌保衛查華爾督軍鏖戰躬冒矢石奮勇登城可否仰邀天語褒獎其餘尤爲出力文武員弁兵勇容臣查明彙入前次保案酌請獎勵至餘姚縣城據道員吳煦楊坊會稟見准華爾知會業經駐紮甯波之常勝軍會同各軍進攻於七月初八日克復上諭李鴻章奏官軍克復青浦縣城一摺副將華爾率常勝軍隨同官兵勦賊屢立戰功茲復躬冒矢石首先登城攻克青浦洵屬不避艱危奮勇可嘉著李鴻章傳旨嘉獎其在事尤爲出力文武員弁兵勇並著李鴻章查明彙案請獎○諭議政王軍機大臣等李鴻章奏官軍攻克青浦縣城並常勝軍克復餘姚縣城一摺此次圍攻青浦縣華爾躬冒矢石爭先效命實屬異常出力該撫自應

善爲駕馭俾華爾益加奮勉所有青浦防守事宜亦須妥爲布置以防賊匪大股復來窺伺見在滬防較鬆兵力有餘亟宜進規蘇常以圖進取曾國藩上游之師業已攻克甯國廣德州賊目童容海亦欲歸順獻城鮑超一軍擬由東壩溧水一帶進攻金陵南路若李鴻章乘松滬屢勝之勢撥兵西攻蘇郡便可與鮑超東下之師聲勢相接俾賊匪應接不暇且可使浙省賊勢與金陵隔斷著李鴻章相度機宜妥籌辦理李鴻章所派駐紮甯波之常勝軍據華爾聲稱已於七月初八日會同各軍攻克餘姚縣城其詳細情形仍著李鴻章左宗棠查明具奏餘姚克復後係何人帶兵守禦能否得力並如何布置防守之處均著李鴻章左宗棠查明辦理將此由六百里各諭令知之○曾國藩奏曾國荃金陵一軍自六月十六二十五日兩次大戰後我軍因疾病過多未能設法攻城

浙賊僞侍王李侍賢大股本欲與僞忠王同援金陵因恐官軍直
逼杭省故以全力駐守金華龍游以拒我師左宗棠定於七月十
二日拔營進紮茶圩泉江兩處劉培元進紮歸塘地方規復龍游
蔣益澧一軍定於七月初九日自長沙啟行赴浙鮑超一軍因童
容海投誠之事人數太多尙未辦妥難遽拔營前進臣本應移紮
甯國與金陵蘇杭徽州聯絡一切並就近料理各賊目投誠事件
無如李續宜見丁母憂卽須請假離營臣當兼顧皖北六安一帶
不能移紮皖南相隔太遠調度不靈深用焦慮又奏安徽撫臣李
續宜見丁母憂例應奔喪回籍守制前經代奏開缺計此摺尙未
到京茲准該撫咨稱見奉諭旨授爲欽差大臣念國恩之彌重慟
大故之遽攬憂傷惶悚罔知所措仍咨臣代陳下悃叩謝天恩
請旨另賜簡放等因查李續宜樸忠敦厚威望素著仰蒙聖上

知人善任畀以全皖軍事飭令接受欽差大臣關防惟該撫聞訃
丁憂以爲不受事則上負 君恩逮受事則內虧子職其憂悼失
措自是發於至情之不容已前此胡林翼在湖北巡撫任內勝保
在欽差大臣任內先後丁憂均奉諭旨賞假回籍治喪此次李續
宜事同一律應仍籲懇 天恩賞假回籍俾得少伸哀慕之忱

上諭朝廷以李續宜忠勇素著倚畀正殷且皖省軍務乏人接替
勢不得不破格奪情實出於萬不得已諒該大臣等亦必能體此
苦衷李續宜當皖省軍情防剿萬緊之際勢難暫令離營較之前
胡林翼陞保丁憂時軍務尤爲緊要前次業經詳細諭知見在江
南北大軍進攻金陵皖省官軍相爲犄角卽如會國藩所奏目下
軍情該督卽應移紮甯國與金陵蘇杭徽州皆可聯絡又可就近
料理各賊目投誠事件極爲洞中窺要若許李續宜賞假回籍則

曾國藩當兼顧皖北六安一帶不能移紮皖南豈不機宜坐失逆賊橫踞金陵俶擾東南已閱十載東征將士血戰之力方能得此時會可乘又幸浙東郡縣義旗競舉甯國堅城克拔東南局勢大可轉旋金陵雖未卽能旦夕收功而逆渠徙避蘇城其奪魄情形滅亾正當立待朝廷深倚楚軍不啻推心置腹以望成功李續宜以國憤家仇闔塞曾臆久思待時乘勢以洩普天之忿況國家倚畀方隆卽曾國藩亦臂指相須實屬無人可爲暫替允宜移孝作忠亟圖滅賊卽所以慰其先靈該撫一門忠孝諒於金革無避之義講之已熟著曾國藩將此次諭旨迅速傳知其毋再行瀆請固辭一俟軍務大定卽仍准令請假回籍補行守制以遂孝思曾國藩無須兼顧皖北卽著移紮甯國聯絡一切以圖進取將此由六百里諭令知之○諭多隆阿奏兵抵襄樊飛撥馬步各營前進並

督率後隊相繼入秦一招毛昶熙奏毫東各捻分竄鹿邑欲趨太康其藍白二旗由鹿邑西走勢將竄擾潼關等語關中軍務改派勝保赴陝督辦其多隆阿之軍節經諭令將南陽西竄之匪剿辦肅清仍候曾國藩酌量檄調或卽爲金陵後路援應雷正綰一軍曾諭官文飛飭繞截賊前杜其入陝之路昨據鄭元善奏南陽敗匪分竄鎮平及安皋等處勢已窮蹙經該撫派令署臬司洪貞謙赴宛督率副將王佐臣等軍乘勢剿洗茲據多隆阿覆奏金國琛等軍跟蹤追殺並經飭令馬隊五營由光化一路閒道疾趨迎頭截擊正可與洪貞謙所督各軍聯絡兜剿嚴行堵賊北竄及南犯楚疆之路此股殘匪諒亦不難迅速殲除見在毫東各捻恐官軍會合擣其老巢分旗出竄意圖牽掣我師並有移巢西山套之信該處山勢延亙西南通宛洛東北卽至汴城斷不可任令蔓延且

賊勢既趨太康更距汴省不遠鄭元善業經回省毛昶熙見亦親赴省垣卽著該撫會籌守禦並飭各屬團練扼要防堵仍卽趕回歸德與僧格林沁籌商會攻亳北捻巢之計並嚴督守備李玉得等及參將陳祿興會合楚勇與僧格林沁所派營總恆齡等馬隊將亳東竄出各旗捻匪探蹤剿擊多隆阿由樊城進發仍催督金國琛等會合豫軍埽除鎮平敗匪並可沿途偵探如亳捻由鹿邑西竄潼關勢必經由河洛且恐其移巢西山套更成負隅卽著一面相機剿擊一面聽候曾國藩調度擇要駐紮雷正綰與穆圖善之軍未知見抵何處著多隆阿官文催令迅速前赴商南迎頭截剿其楚省邊防與豫省交界之處卽著官文妥籌防範毋稍疏虞將此由六百里各諭令知之○癸丑諭議政王軍機大臣等劉長佑奏督軍剿辦潯匪疊獲勝仗及平梧各路剿撫情形一摺劉長

佑到潯兩月屢破賊巢惟匪首均未就擒仍恐勾結爲患著卽督飭鄭金華等分帶兵練將貴縣等處竄匪一律削平無任漏網至所稱荔浦張高友股匪及前竄永福寨沙之匪經道員易元泰等擒斬不少該匪復分千餘人由馬嶺竄出陽朔肆行劫掠等語連塘踞匪既經責成易元泰等勦辦何以任令分股竄擾著卽嚴飭該道等就地殲除勿令再事延蔓蒼梧匪竄廣平並著劉松芳等實力勦除毋畱餘孽前據毛鴻賓奏派兵越境援勦已令將陳士杰趙煥聯等酌量派往著劉長佑卽行催提俟楚軍到後會合勦辦務將連塘等處踞匪次第削平以副委任藤縣金雞艇匪據稱已派委員弁前往招撫隨營立功飭該帶兵官嚴加管束隨時察看以期得力將此由六百里諭令知之○諭各省嚴察捐納軍功人員○予廣西陣亡參將唐榮全世職○甲寅以 梓宮奉移

山陵諭禁沿途地方官苛派擾累○諭議政王軍機大臣等托明阿瑛榮等奏回匪撲犯省城連日獲勝情形並請飭鄂省籌撥軍餉各摺片七月十七十八兩日回匪疊撲官軍營盤經馬德昭督率守備張顯祖營總台斐音布等帶隊迎擊斬獲甚多該逆敗竄回巢馬德昭矛刺悍賊多名實屬奮勇出力殊堪嘉尙孔廣順紮營城外何以未接一仗該提督惟怯無能一至於此著傳旨嚴行申飭如再不知愧奮定將孔廣順重治其罪決不稍寬見在回匪所到之處火光四起咸陽等縣被圍更緊亟應設法兜剿以解倒懸勝保計已入關著卽督率大軍盡力剿洗節節掃蕩直抵西安托明阿瑛榮等惟當激勵兵勇鄉團且戰且守指日大兵雲集蠢茲小醜不難次第廓清雷正綰等軍經多隆阿令其由荊子關西行著嚴飭該總兵速赴商南一帶將髮逆截剿卽馳赴秦中殲除

回匪何紹彩前在郢屬搜捕餘匪著官文等速飭該員督帶所部就近入陝援剿秦楚脅齒相依秦境肅清則楚疆益臻安謐官文等務當先其所急毋誤事機成明所帶京兵止有二千固應慎重第附近州縣如有回匪焚掠或張寶禧等軍均已趕到卽當會兵進剿毋得株守一隅致居民慘遭殺戮成明已駐朝邑何以此次瑛榮奏報尙請飭其前赴同州想係成明起程未經知照瑛榮以復著卽隨時知照多隆阿已由樊城進發著將鎮平敗匪剿除後如探聞毫捻西竄仍當相機迎擊務將由豫入陝之股匪剿除淨盡再行聽候調撥至陝省富饒之區多被回匪焚毀庫款支絀自係實情多隆阿一軍向由鄂省籌撥軍餉亦不遺餘力此次援陝之雷正綰何紹彩等軍除由山陝兩省就近接濟外其餘仍應由楚省解濟至援陝之軍雖經改派勝保亦與多隆阿無異官文等

素顧大局仍著酌量協濟源源撥解彼此通融籌辦庶不至貽誤軍行將此由六百里各諭令知之○諭前因有人奏都司陶昌培作奸犯科無所不爲勞崇光委令赴梧募勇該員奸淫擄掠肆行擾害挾嫌截殺鄉勇搶奪行裝銀兩勞崇光均曲爲庇護復有人奏陶昌培卽降賊陶八在省河包攬走私開設賭博無惡不作又有陶二等爲羽翼大爲民害各等語當將陶昌培革去職銜並令勞崇光崑壽派兵將該革員擒拏並將黎英莫江章昇耀卽章順陶二等一併嚴拏務獲研究得實卽行正法該督於特旨嚴拏重犯迄今已五閱月並無一字覆奏朝廷諭旨竟敢視同弁髦其爲有心徇庇已可概見況節次糾參該督之件朝廷推心置腹徑以詢問該督縱使其中辦理或有棘手亦當據實奏明請旨遵辦乃數月之久並無隻字覆奏不知該督是何居心勞崇光如天良尙

未盡泯接奉此次諭旨著卽迅速覆奏並卽將陶昌培黎英等一併嚴拏務獲歸案審辦務將被參各節逐款嚴訊確情奏請卽行正法以肅法紀而靖地方儻再不迅速覆奏始終怙過陽奉陰違必將勞崇光從重治罪朝廷紀綱具在斷不能爲該督曲法示恩也將此由五百里諭令知之○乙卯諭內閣滿慶恩慶奏將徵呼圖克圖帶印逃走請飭查拏究辦一摺另片奏請加汪曲結布名號等語將徵呼圖克圖阿旺伊喜楚稱嘉木參自咸豐八年掌辦商上事務不思維持地面輒因布施小事激怒眾僧致與布賚綳噶勒丹兩寺互相仇殺將徵呼圖克圖一味負氣揚言已調果洛克野番來藏助戰布賚綳等兩寺喇嘛互相攻擊將徵呼圖克圖見勢力不敵攜帶掌辦商上印信圖記潛逃實屬孤恩怙惡有玷黃教所有從前賞給阿旺伊喜楚稱嘉木參慧能名號廣衍黃

法阿齊圖呼圖克圖敕印及黃纒等件均著一併註銷不准再令轉世仍著理藩院衙門沿邊各省督撫口外將軍大臣蒙古王公一體查拏究辦追出攜帶之掌辦印信圖記送交西藏以免招搖達賴喇嘛公事緊要既據藏中僧俗大眾公舉已辭噶布倫汪曲結布堪以輔佐辦理著照滿慶等所請卽以汪曲結布協理西藏事務並賞給諾們罕名號○諭滿慶恩慶奏將徵呼圖克圖帶印潛逃請飭查拏各摺片將徵呼圖克圖任性妄爲因布施細小事故激成僧俗互鬪重案復敢攜帶印信私自逃走自應嚴拏務獲從重究辦惟兩寺僧眾調兵爭殺於欲得而甘心之人豈容任令潛逃且回寺居住三日僧眾豈毫無知覺滿慶等所奏情節支離顯有不實不盡之處著將確切情形據實具奏不准稍有回護粉飾此次汪曲結布已准協理商上事務既據滿慶奏稱誠實可靠

且名號僅止協理自不至如掌辦事務者之恃權妄作見在藏地危而復安僧俗各安生理卽著滿慶等妥爲撫綏安輯嗣後如再有別項事端致邊地騷然不靖惟滿慶等是問毋謂寬典可以倖邀也至喀徵呼圖克圖見在逃往何處業已明降諭旨通飭查拏仍著滿慶等趕緊追緝並行文知照沿邊各省督撫口外將軍大臣蒙古王公一體查拏毋許鬆懈發去照繕漢文清字諭旨一道以便宣示而安眾心將此由五百里諭令知之○諭滿慶等奏喀徵呼圖克圖業已逃走僧俗人情稍定地面安靖已公舉汪曲結布協理商上事務是藏中人情已安毋需再行派兵彈壓所有前諭調撥番兵餉銀均著駱秉章卽行停止此事雖據滿慶等奏稱事已安定而喀徵呼圖克圖旣爲僧俗所恨何以任令逃逸其中恐別有情節滿慶前保喀徵呼圖克圖代辦商上事務何以並不

審擇眾心悅服之人致令僧俗激變其濫保已可概見恐尚有受賄等情計此旨到日景紋已行抵西藏卽著嚴密查辦務得實情詳晰具奏斷不准稍有瞻徇以致僧俗心懷不服此次所舉汪曲結布是否眾心悅服之人略徵呼圖克圖去後人情是否安定並著景紋一併具奏事關邊疆重務諒景紋不敢含混自干罪戾也將此由五百里各諭令知之○詔順天直隸飭屬捕蝗○丙辰諭議政王軍機大臣等成明奏稱京兵及豫省剛銳勇隊在同郡接仗失利並官文多隆阿奏楚軍先後入關各一摺成明督軍渡河不能激勵兵勇奮力接戰致爲賊匪所乘挫動銳氣馬隊各營均皆失守實堪痛憾該署提督庸懦失機非尋常懲處所能了事見在退守朝邑縣城著卽收集潰散嚴申紀律養精蓄銳以期重整軍威並嚴飭張寶禧所帶剛銳營勇丁扼守同州毋稍疏懈儻再

貽誤事機定將該署提督軍法從事勝保督軍援陝計此時已抵潼關著卽探明回匪趨重之處迎頭痛勦惟該匪黨與眾多蔓延日廣潼關以西至省城數百里均係回匪巢穴其渭河以北至涇陽城外各村鎮均爲賊匪焚毀見復擾及咸陽圍攻城池甚急洛河以西大荔朝邑等縣俱有賊蹤勝保亟宜會合雷正綰所部楚軍分路並進以分賊勢多隆阿前已令雷正綰一軍由荊子關西行並令穆圖善一軍繼進著卽飭令由武關一帶馳入藍田直抵省垣並著官文速飭何紹彩一軍由鄖陽商雒一路馳赴西安爲雷正綰等後路接應毋稍遲延勝保入陝以後卽著與成明一軍聯絡聲勢毋令賊匪沿河東竄致晉省情形益形震動見在陝省情形非常緊急多隆阿一軍著仍遵前旨截勦河洛一帶竄陝股匪卽在河洛適中之地駐紮爲各省策應之兵藉資休息而壯聲

援豫省鎮平一帶竄匪著鄭元善迅派兵勇勦辦並著官文飭令金國琛所部越境追勦務就豫境殲除毋令西竄陝境其河洛一帶防務鄭元善亦宜督飭在事文武嚴密布置毋稍疏懈晉省西南一帶防務緊要此時益宜加意籌畫英桂務當飭令沿河兵勇密爲防範不可有名無實任令匪蹤偷渡闖入晉疆將此由六百里加緊各諭令知之○譚廷襄奏幅匪散處蘭費人眾勢分敎匪屯聚鄒曲人多勢合自臣由秦抵克當卽拔軍駐守曲阜一面派隊於郡南之鄒縣一帶連營扼紮先後增撥兵勇分赴蘭費會同原駐兵勇擇要圍攻旋據參將范正坦等稟稱於七月初間進勦武得圍匪獲勝後探知南鄉之舒家官莊係屬匪巢因於十四日會督兵勇疾趨而進該匪出圍抗拒勢甚兇猛前隊兵勇齊開槍礮擊斃悍賊二十餘名生擒匪黨舒記終等十餘名十五日該員

等復督隊環攻匪眾支持不住由西面覓水竄逸被我軍殲斃甚多兵勇乘勢入圍按殺立將房屋礮臺一律平毀又郟城境內神山民團先被匪首宋三岡糾眾圍攻經奎芳范正坦等督軍堵擊該匪復分股圍撲黃土堰民團亦經該員等迎剿獲勝先後斃匪二百餘名生擒長髮悍賊五名內有匪首陳士琦一名至教匪全股仍踞鳳凰山內時出劫掠糧草七月二十六日都司銜劉志和等巡哨至鄒縣迤南四十餘里適遇該匪搶割秋禾揮軍奮擊登時殺斃數十名羣匪遁回查教匪憑險負隅其寨周遭數十里皆用土石壘成近復加高培厚防守嚴密以臣見有兵力而論圍固不能攻亦不易已節次分飭將弁先以斷截接濟爲要一俟日內添募勇隊到齊當酌度情形大舉進攻至蘭費一帶匪圍林立須將負固不服之匪圍先剿數處使羣情咸知震懾然後可迎刃而

解至副都統德楞額一軍在嶧縣圍雲谷山匪巢未克探聞該匪夥黨不過數百人祇因峭壁層巖勢頗陡峻一時不易得手見值郊城神山一帶匪蹤未戢並恐遁匪王廣繼一股併入必須趕緊合擊臣已咨會德楞額酌量就近兼顧不可爲一隅羈絆以致遷延上諭敕匪全股屯聚鳳凰山內憑險負隅其寨周圍數十里皆用土石壘成近復加高培厚防守嚴密該撫節次分飭兵團進攻雖小有斬擒並未大受懲創據稱以斷賊接濟爲主俟募勇到齊再行進攻惟此股匪徒人數眾多必當密速剿辦以期盡絕根株疊諭該撫駐紮沂適中之地居中調度著卽相度情形移軍進紮前敵使賊勢日蹙方可一鼓蕩平蘭費匪圍林立必須飭帶兵各員實力痛剿未可率爾議撫雲谷山匪眾無多卽飭德楞額趕緊攻克不准再有遷延將此由六百里諭令知之○丁巳明誼等

奏俄人在塔城南邊卡倫外莫多巴爾魯克等三處私立鄂博卡
七處當派員向該國使臣理論並委員帶同該使臣所派之人前
往卡倫將鄂博拆毀其北邊開齊鄂博數處亦經該國使臣允俟
南邊拆毀鄂博官差回再隨中國委員前赴北邊折毀又有俄國
頭人私入伊犁邊界內設立卡倫並率領哈薩克布魯特多人馱
運礮械阻我查邊之路稱哈薩克等處爲該國地方又查特木圖
淖爾齊桑淖爾等處均在伊犁塔爾巴哈台界內由此議分則我
國原設卡倫被其包入且距伊犁之索倫錫伯營不及百里距塔
爾巴哈台僅三五十里奏入命明誼等與俄國使臣會議時據圖
剖晰毋任侵占○戊午諭勝保馳赴同州迅剿回逆○撥京餉銀
十萬兩解僧格林沁軍充餉○己未諭議政王軍機大臣等僧格
林沁奏派隊追剿西竄捻匪迎剿永城竄匪各情並歷陳陳苗練情

形鄭元善奏稔突竄鹿邑及粵逆盤踞鎮平各摺片稔匪姜台凌等率眾出巢竄至亳州東南經僧格林沁調派營總恆齡等跟蹤追剿扼賊北竄該逆遂攻撲西華縣城知縣徐炳登陣守禦匪勢雖覺漸退而該逆奔竄靡定亟宜併力兜剿以遏兇鋒著僧格林沁嚴飭派出之恆齡等跟蹤追躡痛加剿洗惟該逆避兵西竄必須得一枝勁旅迎頭截擊著鄭元善速飭洪貞謙馳赴許州會同楊長春所部確探賊蹤與恆齡等馬隊前後夾擊聚而殲旃毋令蔓延爲患永城以東捻匪竄踞岳家集一帶經營總富和帶隊往剿頗有斬獲該匪愈聚愈眾知縣陳灝督剿陣亡仍著僧格林沁責令富和實力剿辦務將岳家集孟家樓等巢穴攻破毋稍鬆懈毛昶熙業已回省著卽密飭各屬團練扼要防剿永城縣境既有賊匪屯聚毛昶熙自應仍回歸德調撥宋營兵勇會同富和將

李家林一帶踞匪剋日殲除勿畱遺孽至粵匪圍攻鎮平縣城經官軍擊退後仍在距城不遠之村莊盤踞肆擾多隆阿見在計已行過襄陽著就近將鎮平敗匪掃除淨盡再行相機前進所有撤赴商南之前敵馬隊著卽趕緊折回南陽鎮平一帶會同盧得勝各軍攻剿毋得貽誤此次晉省協撥皖營軍餉一萬兩著以五千兩解赴勝保行營以五千兩分解太和軍營勻撥濟急僧格林沁所請部撥庫款十萬兩以濟急需本日據英桂奏委邵煜沈珍分解京餉十萬兩業已起程已諭令該撫將此項銀兩解赴僧格林沁軍營交納該大臣卽派員沿途迎提以期迅速將此由六百里各諭令知之○諭僧格林沁奏苗沛霖甫經歸正全在地方大吏妥爲駕馭方可不至決裂見在楚軍與苗練仍有各不相容之勢請飭李續宜顧全大局各等語苗練藉就撫之名威逼各圩收集

羽翼其居心實屬叵測李續宜懾以兵威使之潛消桀驁自是正辦第陝省回匪猖獗毫捻大股又復西竄當此各路軍務喫緊之時若該練意不自安致成反側雖該大臣一軍兵力強盛可以勦辦深恐四出滋擾備多力分轉形棘手見在僧格林沁已札飭苗沛霖奮勉圖功將攻勦捻匪情形隨時稟報暫示羈縻惟相隔較遠仍有鞭長莫及之虞著李續宜統籌大局妥爲駕馭務使該練於知畏之後繼以知感庶地方早就肅清此事關繫甚重疊經諭令該大臣妥籌辦理想自能斟酌萬全也勝保辦理苗練一味偏袒僧格林沁素以公事爲重其心無私前在連鎮高唐等處辦理勦撫各節寬嚴得宜持論亦無偏倚該大臣之待僧格林沁不可與勝保一例看視如僧格林沁有未能見及之處該大臣不妨詳晰指陳庶彼此心心相印可以和衷共濟實所深望僧格林沁原

片著鈔給閱看將此由六百里諭令知之○諭徐之銘奏見在海
省安堵如常附省州縣均已退出城池聽官辦理如兵練入滇恐
大局復有變動大理西路尙未就緒經馬德新等一力承擔請飭
張亮基不可統帶兵練來滇等語見在撫局已定該撫即可因勢
利導使地方悉臻安謐至張亮基奉旨辦理滇省事宜帶領兵練
護衛亦係體制當然果使滇省已如常安堵無須用武所帶兵練
即可於到滇後遣散此意本日已諭知張亮基酌辦林自清既不
可入滇於張亮基亦無所益本日亦經諭令張亮基察看辦理徐
之銘惟當鎮撫回眾明白曉諭令其不必驚疑並就見在應辦事
宜悉心籌畫俾張亮基入滇後相助爲理悉臻妥協其餘可無庸
過慮也另片奏張亮基告示毋庸黏貼及密陳岑毓英可備任使
二片均著畱中張亮基所發告示係屬勦撫兼施並非專主勦辦

徐之銘可於曉諭回眾後卽行張貼毋庸避忌將此由五百里諭令知之○諭前因馬如龍欲阻潘鐸張亮基入滇曾經諭令該督等詳細斟酌此次徐之銘又稱滇省回民間張亮基帶兵前來人驚疑大軍入境恐有開仗堵禦之事請飭該前督輕車減從不可多帶兵練等語是徐之銘事事全爲回人挾制恐張亮基到滇非其所利故作此張皇之詞其所稱滇省撫局大定迤西一帶亦可次第辦理各情尤不足信張亮基潘鐸將來入滇以後一切進止機宜務當熟籌審處謀出萬全不可稍涉大意致墮奸計至林自清應否隨同赴滇抑或畱川差遣仍著駱秉章潘鐸張亮基妥籌辦理其林自清部下兵練尙紮瀘州該督等亦須設法安置或酌量調遣或妥爲遣散以弭後患如必須挈帶林自清入滇亦須設法妥辦不可過涉張皇一切辦理情形並著隨時具奏所稱滇

省鹽價平減請將加運川鹽及招販捆運之處概行停止與見在情形是否相符又稱東川開局鼓鑄有礙大局請飭張亮基將所收七萬兩解交滇省藩庫以重帑項等語均著駁斥章張亮基等酌量情形妥爲辦理徐之銘摺片共五件均著鈔給閱看將此由六百里各諭令知之○予河南陣亡署知縣陳灝祭葬世職建祠○庚申諭議政王軍機大臣等勝保奏陝回猖獗剋日馳抵潼關相機勦辦暨官文等奏援軍赴陝畱兵防守靳黃襄郡各摺昨因托明阿等奏回匪撲犯省城望援緊急成明奏京兵豫勇在同州失利節經諭令勝保赴同州一帶率同成明奮勇進勦雷正綰穆圖善兩軍經官文等奏明由荊子關西行入陝並卽飭催由商南或浙川徑援西安晉省河防仍令英桂嚴密布置矣陝回猖獗已極成明一軍到陝後毫無布置一經接戰遽至挫銳此等失機非

尋常懲處所能了事業經諭知該大臣等飭令該署提督收集潰散重整軍威如再貽誤事機定卽軍法從事勝保節制全陝軍務此軍亦歸節制著卽妥爲調度此時同州至西安省一帶悉爲匪踞勝保大兵總應由同州一路迎頭進剿並須兼顧晉防杜賊北窺之計方爲勝算至雷正綰穆圖善前後兩軍旣紮商南其鎮平一帶有多隆阿之軍兜剿可以無須回顧應否進至西安並如何與勝保之兵分路同時進剿之處卽著勝保相機妥爲調派該大臣督兵有年當茲重寄諒能計出萬全務使逆回大受懲創庶能誠心知悔知懼晉省兵力本弱蒲州防兵無可調撥餉源所出關繫緊要馬陞見在該大臣軍營新放太原鎮總兵若能分兵令其赴任籌防本境當可得力如或不敷分撥應如何妥籌兼顧卽由該大臣酌度辦理珠爾杭阿等兵諒已折回晉省英桂仍就沿河

地方嚴密防守毋稍疏虞南陽竄匪仍在鎮平一帶盤踞多隆阿
昂由南陽前進正可探蹤迎剿務將醜類悉數殲除俾不得西竄
陝境與回匪勾結則勝保入關之軍可無腹背受敵之慮鄂省援
軍四出各處毗連地方亦須防範周密官文請以何紹彩所部駐
守荆子關屏蔽三省並爲各軍後路接應襄陽蕲黃畱金國琛等
軍防守不能入陝卽照所擬妥爲辦理並飭周鳳山歐陽正墉等
軍將信陽等處匪巢迅掃以通驛路至皖匪見扮官兵在襄郟一
帶焚掠逼近汝州又續行竄出毫捻窺伺太康通許及許州境地
張落刑大股復突然西竄與昨鄭元善所奏之竄出毫捻是否一
股紛投四竄僧格林沁所派恆齡及蘇克金等之兵能否會合制
其奔突鄭元善監臨將已竣事卽著親赴河洛一帶督飭洪貞謙
及楊長春等軍確探賊蹤與恆齡等併力剿擊尤不得令羣捻再

由汝陝西趨苗練歸誠本責令勦擒立功何以輒令張落刑大股
出竄僧格林沁誠能動物應能激勵之仍使奮力追勦殲擒首惡
以爲立功報效地步勝保於抵關後著卽將進兵情形與確偵陝
西省城各情速行奏聞正在寄諭閒成明奏到近日回匪進圍朝
邑情形甚屬危迫著勝保入關後卽行迅速籌畫援應毋令再有
疏失所請畱珠爾杭阿等兵該大臣大兵到後自可酌爲撥替俾
仍回顧晉防方爲妥善成明連次發遞六百里加緊摺報甚屬輕
率嗣後軍情卽令統歸勝保奏報以一事權將此由六百里各諭
令知之○諭駱秉章奏查訪西藏喇嘛啟釁情形一摺據稱布賚
綳寺值年堪布剋減布施將徵呼圖克圖已將該堪布革退布賚
綳寺喇嘛十七支內有洛塞嶺巴一支素本桀驁藉口眾心猶未
鑒服擁至將徵呼圖克圖處滋鬧滿慶等派糧務委員李玉圃遊

擊懷唐武把總馬騰蛟查辦李玉圃等徧徇布資綳寺私發斷牌以致兩造不服布資綳寺復約同噶勒丹寺番眾私取布達拉山武庫槍礮轟擊該呼圖克圖屢向滿慶等衙門投訴均爲李玉圃馬騰蛟蒙蔽不辦噶勒徵呼圖克圖遂開槍拒敵漢番均懷驚恐布資綳等兩寺復糾眾赴滿慶等署喧鬧要挾並串通李玉圃將素本狡詐之參革發遣噶布倫壁喜向滿慶面請調回調停壁喜遂逞私忿必欲將呼圖克圖屠滅合藏兵民皆爲不平等語與滿慶等疊次所奏情節迥異見在噶勒徵呼圖克圖雖經去藏而兵民俱爲之稱冤滿慶等何以並未奏及且目覩該寺喇嘛構釁互訐及布資綳寺僧眾強取庫械閭閻喧鬧要挾各情何以任聽李玉圃等始終蒙蔽毫無覺察且滿慶等前次奏稱有李玉圃等鈔呈所發斷牌稟請轉行噶勒徵呼圖克圖查照完結等語李玉圃等斷牌

既係私發何以滿慶等並不訊究且將此事入奏情節尤屬支離
是否滿慶等袒護布賚細寺僧眾並授意李玉圃等徧斷以致釀
成巨案著景紋於抵藏後卽將確情詳細查明據實具奏毋得稍
事徇隱代人受過李玉圃馬騰蛟二員既爲兵民怨謗其辦理不
善已可概見並著景紋將該員等先行撤退仍將蒙蔽把持劣蹟
查明嚴參從重治罪其壁喜一犯卽著解回配所毋令盤踞藏地
致生枝節如查有主謀搆毀實據仍著嚴行治罪以儆兇狡滿慶
等見保之汪曲結布是否堪以協理西藏事務並藏地情形曾否
安謐均著迅速具奏將此由四百里諭令知之○辛酉諭議政王
軍機大臣等瑛瑱奏回匪逆勢蔓延望援萬緊請飭勝保早日入
關雷正綰星夜來省一摺據稱雷正綰已抵商南經多隆阿飭令
暫爲駐軍而陝省盼此勁旅遷延不進大爲失望連日拏獲奸細

供稱回逆安排一面踞住北山一面派人將甘肅老回迎來由鳳翔一帶殺往西路各等語渭河南北回燄甚熾近已焚殺耀州以北及咸陽以西至鄠縣地方與奸細所供符合其兇狡情形亟應大兵及早痛剿勝保計抵潼關已經數日自當籌定進兵之策南陽竄賊尙在鎮平淅川盤踞多隆阿計已行抵南陽卽著督兵痛加截剿盡殲醜類毋令再行西竄昨據官文奏何紹彩所部四營駐守荆子關該處與鄖西商南均屬毗連如豫匪西竄似已足資堵遏該處防務較鬆著勝保多隆阿迅飭雷正綰穆圖善率領所部前進西安省城危急如何設法救援並如何與勝保一軍聯絡聲勢之處卽著妥爲調派務須計出萬全不令爲回匪所截方爲妥善其商南應否酌畱兵勇爲荆子關援應並著勝保酌量辦理仍著瑛榮激勵兵民固守待援毋稍疏失至所稱逆回計欲勾引

甘肅老回卽著恩麟嚴密防範飭令地方官不動聲色稽查奸匪並曉諭良回各安生業杜其勾串之患毋得張皇輕率將此由六百里加緊諭知勝保多隆阿瑛棨並傳諭恩麟雷正綰知之○王戍諭議政王軍機大臣等前因陝省軍情喫緊特命勝保統兵赴援疊據奏報業已行抵潼關矣陝省回匪猖獗前命多隆阿督師往勦中外歡忻愜望以爲得此勁軍回氛必可迅速殄滅朝廷拯民情切恐多隆阿道遠不能速到改派勝保前往乃命下之後人言藉藉咸於勝保有不滿之詞且逆料將來必以敷衍了事斷不能如楚師之可與成功因思勝保不滿於人之處如喜誇張多嗜慾輕於受降濫於用人好諛惡直尙氣任性均所不免至敢於諫諍明於料敵勇於陷陣則勝保之所長也朝廷節取其長專心委任勝保卽當自知所短存一有則改之無則加勉之心不可以口

舌辯論爭長關中地近畿輔回匪聲勢潛通數省其狡詐狠毒尤倍髮捻勝保此行誠天下全局安危之所繫且該省望兵如望歲時雨之師民心感悅必能事半功倍果能仰體朝廷獨任勝保之意卽當知勝負係兵家之常字字從實奏報力挽積習屏除嗜好壁壘煥然一新朝廷固不吝厚賞勝保亦正可藉葢前愆使從前詆毀勝保者轉而譽揚豈不甚善若徒逞虛鋒毫無實際誇張粉飾不出人意料之中致陝事又成不了之局則公論難逃朝廷豈能置而不問當不獨楚軍之從而笑其後也懍之勉之將此由五百里密諭知之○癸亥諭議政王軍機大臣等勝保奏督兵馳抵潼關擬由華州一帶進剿多隆阿奏援軍分起入關徑赴西安會剿各一摺前因成明失利疊經諭令勝保入關後由同州府屬相機進剿原以同蒲密邇同郡廓清則蒲郡益臻安謐茲據勝保奏

稱同州之王閣村倉頭等處卽係逆回巢穴是同郡情形甚爲緊要勝保擬急趨西安先援省垣雖係釜底抽薪之計第該回匪半爲無業未必因大軍直趨西安遂各回顧老巢儻探悉官軍大隊西行出巢東擾則晉省沿河各州縣處處震動於大局甚有關繫本日據多隆阿奏前隊雷正綰穆圖善等督率馬步各隊日內可以抵省該將軍亦卽繼進准於月之望前可抵陝西省會惟所部兵勇長途跋涉極形困頓馬匹倒斃甚多等語該將軍旣已行抵西安若再令其折回更屬疲於奔命且西安正盼援兵得此一軍旣可暫紓眉急亦可暫息楚軍之力況朝同一帶緊逼晉疆賊已屢次撲犯若大軍均赴西安則賊必乘隙東趨牽我兵力蔓延秦晉兩省所關非細著勝保迅卽折回同州向西南節節進剿將王閣村等處巢穴悉數掃蕩俾逆回等震懾兵威望風披靡則援

陝之功不爲不偉其渭河以南卽著多隆阿分軍繞赴東路由華陰一帶向西進剿仍一面與勝保渭北之軍聯絡聲勢以收夾擊之效一俟西安東路稍靜省垣安定多隆阿未經折回商南之前應如何分兵商榷駐紮防堵之處著該將軍妥籌調派自商南潼關及渭河以南各處卽暫行責成多隆阿辦理如有疏虞惟多隆阿是問自朝邑及渭河以北各州縣並山西濱陝地方卽暫行責成勝保辦理如有疏虞惟勝保是問勝保多隆阿皆係公忠體國之人諒必能顧全大局和衷共濟以期力挽時艱據勝保繪圖貼說醴泉縣西北係往甘省要路須撥兵駐守豫防竄越著多隆阿與瑛榮會商籌酌或抽調馬德昭一軍前往該處擇要扼守勝保攻剿東路回匪如必須西路官軍策應卽著咨商多隆阿派兵會剿以期兩路互爲聲援至南陽竄匪尙徘徊於鎮平內鄉等處難

保不乘閒西趨著多隆阿妥籌兼顧不可疏忽勝保摺內所稱來營投效之王守基李萬年所帶勇丁一千五百名究係何處人員著勝保詳晰具奏河南與山陝交界地方防捻兵勇紮營處著勝保一併查明詳細繪圖貼說具奏將此由六百里加緊各諭令知之○甲子諭內閣前因多隆阿帶兵赴陝兩月未到官文並不遵旨嚴催奏報又復遲延降旨交部議處茲據吏部等衙門奏請將多隆阿照違制律議以革職官文照不應重例議以降二級畱任等語多隆阿自廬州赴陝據官文等奏稱實因冒暑遄征該將軍及隨營官兵均多患病且節經阻雨遲誤係出有因惟官文多隆阿於軍情緊急事件並不迅速覆奏實屬咎有應得姑念多隆阿見已力疾馳抵陝境尙非始終貽誤多隆阿著加恩改爲降三級畱任官文著加恩改爲降一級畱任均不准抵銷○諭駱秉章奏

藩司憑情乞退據實代奏一摺據稱四川布政使劉蓉憑陳到任
六月於民生吏治挽救毫無因見蔣琦齡陳中興十二策中有慎
名器一條益爲愧悚請立賜罷黜代爲陳奏等語劉蓉以湘楚諸
生疊經胡林翼駱秉章保奏受兩朝特達之知不次超擢原與
各路軍營濫保驟進者不同姑無論川省軍務方殷不宜遽行乞
退卽以朝廷用人而論黜陟賞罰一秉大公如果其人才能出眾
不妨破格錄用若以後不能稱職該省督撫旣可隨事劾參朝廷
見聞所及亦必加以擯斥此中權衡操之自上非臣下所能干預
該藩司卽無所用其引嫌所有駱秉章代劉蓉陳請乞退之處著
毋庸議劉蓉惟當盡心地方公事以圖報稱勉爲名臣不必務退
讓之虛文也○諭議政王軍機大臣等駱秉章奏籌款資遣滇練
一摺林自清所帶練勇經張亮基遣散十去其八見畱川未遣者

尚有若干卽著查明具奏林自清爲回眾所不容願帶親兵百餘
名雷川聽調略秉章並未將該總兵及所帶親兵作何安置之處
等及是否可雷川剿賊著略秉章察度情形妥籌辦理如帶赴滇
省可資得力並著潘鐸張亮基妥籌辦理至徐之銘旣知張亮基
資遣兵練回滇輒令迤東各屬文武嚴防拏辦意在使滇練懷疑
不歸無非欲搖動人心爲阻遏張亮基入滇之計本日已諭令徐
之銘檄諭所屬地方官毋得妄行截殺並令出示沿途曉諭該練
以安眾心潘鐸等仍宜隨時偵探情形相機辦理毋稍大意將此
由五百里各諭令知之○乙丑諭議政王軍機大臣等譚廷襄奏
籌剿教匪情形請飭傳振邦幫辦軍務並飭新任河督剋日赴工
各摺片教匪據險死守人數眾多見在兵力未厚勢難深入山險
直搗老巢該撫擬於四面隘口扼賊出路令其不能遠出擄糧爲

逐漸進逼之計見在事勢亦止可如此辦法德楞額一軍進剿蘭
刻匪徒屢次獲勝自可將東路匪寨漸次埽除譚廷襄俟東路匪
蹤稍靖即可知照德楞額令其移軍西向與該撫合辦教匪該副
都統帶兵能否得力並著僧格林沁譚廷襄據實具奏鄒泗各縣
團練如果能齊心殺賊自可令其協助官兵若恃眾抗違別滋事
端卽著查明遣撤西凌阿患病曾否痊愈是否見隨僧格林沁帶
兵抑仍在山東境住守所部兵數若干駐紮何處並著僧格林沁
譚廷襄查明奏聞館陶冠縣境內突被匪擾雖經直東兵勇擊散
並未大受懲創該匪忽聚忽散必有窩集處所著譚廷襄嚴飭附
近各州縣將散竄餘匪實力搜捕並著遮克敦布督飭兵勇鄉團
於大名一帶一體按緝並將卅四等嚴拏務獲以期淨絕根株傳
振邦久歷戎行可資商榷著譚廷襄咨行該提督如業已病痊卽

著馳赴該撫軍營幫辦營務黃贊湯見因河工險要親赴工次搶護未能即時交卸東河總督一缺不久即可簡放當飭卽赴新任也正寄諭間復據譚廷襄馳奏南捻大股突入東境一摺張落刑等五旗並出由鹿邑西竄僧格林沁已派營總恆齡追剿永城一路亦有捻眾出巢其由江南豐縣竄至東省魚臺金鄉縣境者大股屯聚隈濠東西延亘四十餘里並至濟甯州之黃德集距州城不足五十里勢將北竄此股捻匪旣由豐縣而來何以吳棠於徐州一帶絕無一兵堵禦任令竄入東境致無賊地方又被滋擾實堪痛恨若卽係永城屯聚股匪竄至東境是否由豫境虞城一帶而來抑係由江南豐沛一帶竄至其前派富和一軍追剿此股竄匪見在駐紮何處所帶官兵若干曾否跟蹤追擊著僧格林沁查明具奏並將防堵不力之帶兵官嚴行參處該匪日向北趨深虞

授及畿南譚廷襄見雖撥勇丁千數百名令副將保德帶赴長溝並令總兵扎隆武帶兵合剿惟兵力甚單恐不足以資堵禦著僧格林沁迅督勁兵馳往截剿並著遮克敦布撥兵協助一面整飭兵團嚴防大名境內毋令賊蹤竄入並著吳棠督飭總兵黃開榜由徐州馳赴曹單一帶會剿截賊後路以防回竄汶上東平一帶鄉團並著譚廷襄設法鼓勵以資得力將此由六百里各諭令知之○諭袁甲三奏收復官溝王家洲等圩攻克湖溝澮北肅清並投誠匪首汪敦友攻復龍潭各摺片附苗從捻各圩以次收撫金馬胡人眾亦均向化助勦湖溝以西捻巢亦欲赴營乞撫如果誠心歸正原可相機辦理爲次第廓清之計惟該逆反覆無常每當窮蹙之時即以乞撫爲緩兵之策袁甲三務當督飭該將領等加意防範妥爲駕馭於既撫者毋使再萌反側未撫各圩尤須斟酌

辦理不可墮其詭謀李續宜聞訃丁憂尚未到臨袁甲三於防剿事宜仍當認真辦理以資鎮撫商城匪首汪敦友悔罪投誠隨同官軍攻克龍潭見在攻取七里洲該處距九洑洲僅十數里且爲賊營糧道著卽飭令李世忠迅圖攻取以爲進攻九洑洲之計本日據譚廷襄奏擒首張落刑李成趙浩然等五旗並出於七月下旬竄向鹿邑迤西已由僧格林沁派隊追剿其東竄另股勢甚剽疾已竄至山東金鄉魚臺濟甯境內雖經諭令僧格林沁吳棠帶隊分剿誠恐匪勢浩大著袁甲三設法派兵牽制該擒後路以分其勢袁甲三素顧大局定能力疾從公不存五日京兆之心也將此由六百里諭令知之○諭陝西省城自多隆阿之軍到後戰守一切自必妥籌穩固所部諸軍將省外賊巢剿洗後卽當鼓銳由西南轉戰而前與勝保自同朝一路進剿之師互爲聲援痛殲醜

類廓清陝境本日據成明馳奏朝邑被圍懇迅發援兵一摺可見同朝一帶情形尤屬非常緊急著勝保迅遵前旨折赴同州等處將回逆盡力痛剿其渭河以北及晉省濱陝各地方務須布置悉臻嚴密如有一賊渡河東越晉疆該大臣卽不得辭其責晉省防兵單弱此路關繫北面之防及晉疆完善地方尤爲緊要西安省城及渭南一帶業交多隆阿辦理其省城戰守及省外所屬如何籌剿之處多隆阿責有攸歸不得因有勝保在陝意存諉卸渭河以南勝保旣可無容兼顧卽當一力將同朝回匪迅加掃蕩則晉省蒲州等處及沿河地方不虞滋擾保全甚大如意存歧視或專顧省城致將東北防剿稍涉輕忽卽爲有心抗違不遵諭旨諒該大臣不敢當茲重咎成明被困朝邑勝保撥兵無多斷難濟事著勝保飭令成明嚴守待援毋再輕進致誤事機多隆阿與勝保係

共辦一事諒不至稍有成見貽誤大局其省城戰守情形及蒲同一帶防剿機宜著勝保多隆阿將各專責成之處分別迅速馳奏南陽竄匪尙在鎮平內鄉該將軍入陝後商南後路仍著妥籌兼顧毋令豫境敗匪西竄陝疆成明摺著鈔給勝保閱看將此由六百里各諭令知之○諭官文奏援軍入陝請收回成命仍令多隆阿督辦陝西軍務一摺所請收回成命一節此時尙未可行陝回逆勢已張毒焰正熾多隆阿之軍原不能兼顧晉防況甫達西安而所部之軍沿途跋涉暑雨兵勇物故馬多倒斃必得暫令休息是以令其駐紮西安藉資戰守兼以養精蓄銳而蒲同一帶逆回猖獗成明見方被困朝邑必須大兵速由東北籌剿力殄賊鋒兼以籌保晉防勝保已到潼關自應責令迅速駐紮同州與多隆阿南北聲勢相倚以拯陝疆之危俟該省軍務稍有就緒應如何斟

酌調派俾各有所責成之處屆時方可從長計議此時不但勝保督兵已到陝疆不能遽行撤去而同蒲一帶亦斷不可無此一軍進剿多隆阿所部所向有功朝廷原以陝事緊要倚任甚專乃降旨數月以來陝回日事鴟張該省官民呼籲頻聞而該大臣及多隆阿奏報杳然並無何日准可到陝之信適勝保移軍河洛距陝較近始不得已而有改派之命是督辦軍務之改派勝保實因奏報遲誤之故朝廷實出於不得已非信任多隆阿之不專也今勝保多隆阿均已先後抵陝當此陝回逆燄益張兵患其少而不患其多勝保多隆阿亦止從權代爲區畫以期於陝事有濟至勝保性情驕恣與各路將領多不相得誠屬不免多隆阿忠勇素著聲望日高朝廷亦所素悉惟見當需材孔亟之際不能不略短取長兼收並用諒官文多隆阿均能仰體此意也官文惟當迅速知照

多隆阿以國事爲重勉事含容將西安戰守妥籌布置卽自西南節節出剿與勝保之軍互相犄角毋得彼此稍存成見致誤戎機方足見大臣體度南陽竄匪尙游駛於鎮平內鄉等處難保不仍復聚煽伺隙西犯多隆阿後路仍須妥籌兼顧官文仍飭令何紹彩等軍就近相爲策應毋稍疏忽將此由六百里諭令知之○諭官文嚴樹森奏遵旨會籌軍情並將六省要隘繪圖呈覽一摺見在多隆阿已入陝省何紹彩等駐軍荊子關等處分遏秦豫之衝楚省已屬無兵可撥而川匪竄擾之處逼近楚疆上游處處喫重不能不嚴爲防備以固根本著官文嚴樹森就本省見有兵力飭令各屬加意防範毋令外匪闖入會剿蒙毫捻匪旣據奏稱力難兼顧著俟秦豫邊防稍鬆再行酌量抽撥該大臣已函致僧格林沁等妥籌辦理惟軍情變幻旦夕不同如續有聞見不妨與僧格

林沁等往返函商以收和衷共濟之效前此南陽被圍緊急鄭元善身任封圻自應力圖援救乃以監臨居期徑爾旋省置軍務地方於不顧實屬不知緩急旋經楚軍入境痛剿始解城圍未聞該撫派兵夾擊以致西路空虚敗賊悉竄鎮平淅川一帶該撫起家縣令不數年遽領封疆宜如何激發天良勉圖報稱前諭於監臨事畢卽行出省著懷遵前旨親赴河洛一帶督飭洪貞謙等實力進剿並探明何路賊勢最重卽行移師剿辦儻再遷延退縮致令賊蹤竄擾完善地方定將該撫從重治罪勿謂朝廷寬典可以倖邀也正在寄諭間據袁甲三奏轉據李世忠呈稱江南龍潭地方經李顯發相機攻取適有商城匪首汪敦友赴營投誠卽令充當前敵汪敦友奮力前驅連戰皆捷當將龍潭要隘奪回請咨明河南巡撫註銷汪敦友被控原案等情著鄭元善查明該犯被控是

何情節據實奏聞並咨覆袁甲三察覈辦理將此由六百里各諭令知之○命傳振邦幫辦譚廷襄軍務○撥長蘆運庫銀五萬兩濟僧格林沁軍餉○丙寅李鴻章奏青浦爲蘇州門戶賊所必爭自克復後副將程學啟入城布守卽據謀報僞忠王李秀城調蘇崑嘉興等處賊眾十餘萬由西北兩路撲犯七月十九二十等日僞幕王譚姓率二萬餘眾直撲青浦西門經黃翼升礮船擊退二十五日繞撲北簞山營盤副將滕嗣武等堅壁靜守乘該逆填橋渡水之際槍礮環施斃賊目數名適水師礮船駛抵西南河橋併力轟擊而鳳凰塘橋各營亦整隊來援賊卽敗走該逆旣不得逞於青浦復以大股偏攻北新涇該處爲上海西路衝要先經臣派已革總兵況文榜等統率兵勇駐紮二十七日逆眾數千由張官渡過河猛撲我軍開礮力拒殪賊不少副將梁安邦等督隊夾擊

火器齊發該逆仍無退志二十八日臣派前往助勦都司劉玉林衝入賊隊生擒十餘名斬賊酋二人賊爲披靡劉玉林率數十人逐之中槍落馬賊矛環刺登時陣亡守備熊得春亦歿於陣八月初一日各路賊眾環撲北新涇營內糧藥缺乏賊越營後擾及法華之西距上海僅十餘里臣令副將張遇春等分督隊伍嚴陣於法華左右副將王東華督帶礮船由洋涇濱駛過曹家渡毀賊浮橋三座斃匪數百名復揮眾登岸衝殺將至北新涇張遇春亦由陸路派隊來應賊退數里其法華街西之賊經都司苗順清馬隊衝潰查該逆大股十餘萬麕集近郊臣所部得力兵勇不過萬餘除分防各路外存滬營者僅二三千人兵力實形單薄見飛調劉銘傳吳建瀛回營由金山衛拔隊回援程學啟滕嗣武韓正國等各帶所部由青浦北簕山分路夾擊又調華爾常勝軍由松江

來滬據蘇松太道吳煦稟報華爾並約會英法各兵合力迎擊其北新涇營仍飭況文榜等鎮靜嚴守俟各路兵勇調齊卽會合洋兵分路援剿 上諭議政王軍機大臣等此次蘇崑嘉興等處賊匪十餘萬分股撲犯青浦縣城及北蕪山營盤雖經官軍擊退而該逆大股復敢偏攻北新涇營盤是賊因金陵攻急恐滬上一軍由崑山進襲蘇州奪其巢穴故爲此牽掣我師之計北新涇爲上海兩路要衝而營內糧藥缺乏李鴻章見調劉銘傳等四營回援並飭程學啟等帶兵分路夾擊卽著嚴飭各該員弁迅速援剿務將大股悍賊悉數殄滅肅清滬防李鴻章所部得力兵勇不過萬餘除調防各路外存滬營者僅二三千人兵數太單旣據華爾約會英法各兵合力迎擊卽著李鴻章相機妥辦以厚兵力而埽賊氛況文榜係革職拏問之員該撫派令駐紮新涇防堵未必真能

得力自應仍遵前旨解赴左宗棠軍營候審所管防務卽揀派委員前往接替將此由六百里諭令知之○諭各省清查流品○丁卯諭內閣瑛榮奏請將被難各員分別優卹一摺陝西回匪與漢民互鬪經前任都察院左副都御史張芾率同候補直隸州臨潼縣知縣繆樹本山西候補知縣蔣若訥回紳候選知府馬百齡俊秀張濤分往彈壓行至油房街地方被回匪擁至倉頭鎮於五月十三等日先後將張芾等殺害張芾罵不絕口被禍尤慘馬百齡另在普陀原圈禁聞張芾等被害大罵回眾亦被殺死覽奏曷勝憫惻張芾辦理陝省團防屢著勞績茲復見危授命大節凜然著加恩照侍郎例從優賜卹伊子二品蔭生張師劬著賞給舉人准其一體會試繆樹本著照知府例蔣若訥著照同知例馬百齡著照道員例張濤著照縣丞例均交部從優議卹並著於陝西省城

建立張芾專祠繆樹本等准其一併附祀以慰忠魂○李續宜奏
臣於七月初六日在六安營次聞訃丁母憂後當將經手事件趕
緊料理於八月初二日行抵安慶初四日接奉諭旨令臣仍任軍
事何敢妄行瀆請自外生成惟是臣父年七十有四母今年七十
有七咸豐九年臣自湖北回援寶慶迨後班師還鄂便道省親其
時臣母卽患風痺之證臣父齒髮益衰臣久欲乞歸顧以時事多
艱受恩未報欲陳復止者屢矣因循四載卒至大故此臣不孝之
罪每一念之中心如割者也聞臣父近年血氣益衰人子之心須
臾難忘臣自去年五月患心熱乾咳自秋徂冬復添咯血之疾自
聞訃丁憂旣慟臣母之棄養復憂臣父之更衰百病俱發遇事昏
迷實難仰副朝廷委任之重惟有籲懇天恩准臣回籍奔喪稍
伸哀痛之情慰臣父倚閭之望臣心稍安卽當力疾仍赴軍營殫

竭血誠力圖報稱見在皖省地方自勝保去皖苗沛霖失所依護
氣燄愈衰前月稟請道員蔣凝學轉求於臣願將正陽關壽州均
行退出臣當飭蔣凝學察看情形調營駐守其六安霍邱固始潁
州各城臣均宜撥營嚴防又畱提督成大吉道員毛有銘兩軍暫
紮三河尖以爲遊擊之師臣軍旣未移動又歸曾國藩節制調度
呼應最靈苗沛霖此時必不敢大肆鴟張至袁甲三病勢較重更
替乏人臣亦何敢不悉心思議敬舉所知查有湖北布政使唐訓
方寬厚恂謹久歷戎行諳悉戰守事宜如蒙天恩令其駐紮臨
淮接統袁甲三一軍當可保全要區上諭據李續宜奏瀝陳哀
惻籲懇賞假回籍奔喪俾得稍申哀痛之情慰伊父倚閭之望仍
卽前赴軍營力圖報稱等語覽其所奏情詞懇切出於至誠且該
撫舊病未痊若令在營窮孝強抑哀悲非所以示體恤見在安徽

巡撫已派唐訓方暫行署理李續宜著賞假百日准其回籍治喪
假滿後卽行馳赴安徽軍營接署撫篆惟見在安徽軍務甫經就
緒鎮撫機宜在在需人治理李續宜著俟唐訓方馳抵署任後再
行回籍該撫當仰體朝廷破格奪情之意務以軍事爲重毋得再
行瀆請○諭前據僧格林沁奏楚軍與苗練仍有各不相容之勢
請飭李續宜顧全大局等語當經諭令李續宜遵照辦理將籌辦
情形與僧格林沁詳細酌商並據議政王軍機大臣等將僧格林
沁所致信函呈覽該大臣公忠體國所論軍務大局及辦理苗練
情形權時度勢甚爲切要苗沛霖從前陰鷲狡猾其甘言輒語原
不足恃如勝保之以事事曲從爲撫固無了期然必堅持成見不
予以可轉之機必將決裂亦非辦法李續宜猝丁母憂業經賞假
百日令唐訓方前來署理酌量駐紮袁甲三雖因病開缺見尙未

能交卸際此新舊乘除一切控馭機宜尤關緊要前據該大臣奏已札飭苗沛霖奮勉圖功將攻剿擒匪情形隨時稟報未知苗沛霖曾否稟復而見在圍攻南陽之髮逆回竄河洛其太康擒股又復竄至朱仙鎮一帶聞張落刑亦在其中並未聞苗沛霖派練剿擊可見其尚懷觀望並不肯奮勉出力該大臣仍當設法籠絡予以自新使其知畏知感奮力剿擒俾擒匪有所牽制不能長驅出犯庶該大臣得以直擣擒巢廓清腹地淮北軍務已責成該大臣節制所有苗練及擒匪剿撫各事宜均著審度時勢權宜辦理勿稍拘執將此由六百里密諭知之○諭李續宜奏籲懇賞假回籍奔喪一摺已降旨賞假百日准其回籍矣皖省粵逆雖就肅清而徐宿蒙亳等處擒匪屢次出巢肆擾且正陽關壽州各處苗練耽耽虎視亦未必帖耳就撫曾國藩節制四省軍務綦繁見值進剿

金陵調度正當喫緊院北關繫緊要必須得人督辦俾曾國藩得以專意東征據李續宜奏稱唐訓方久歷戎行熟諳戰守著官文速飭該藩司前赴安慶接署撫篆毋稍遲延其應否駐紮臨淮接統袁甲三一軍之處並著曾國藩酌度具奏前因袁甲三奏病勢難支降旨准其開缺見在李續宜給假回籍臨淮當南北之衝戰守事宜不容稍懈唐訓方甫經到皖一切情形尙未熟悉必須該大臣相助爲理著袁甲三力疾從公妥籌辦理所有欽差大臣關防仍俟李續宜假滿回皖再行交卸勝保前辦苗沛霖撫事種種遷就物議沸騰僧格林沁老成之見其心無私且係節制淮北軍務不可與勝保一律看視唐訓方抵皖後所有駕馭苗沛霖之法當與僧格林沁詳細籌商不可意存歧視昨據袁甲三奏龍潭攻克見復攻取七里洲以斷九洑洲之糧道能否得手著曾國藩審

度機宜妥籌辦理本日又據馮子材奏鮑超一軍八月間可至金陵等語著曾國藩酌量情形催令該提督迅速移師以期厚集兵力廣德州賊目投誠一事辦理有無就緒著曾國藩迅速具奏將此由六百里各諭令知之○諭駱秉章奏遵旨覆奏一摺據稱張亮基遣散滇練川省籌備行費已經解往見聞瀘州尙有滇練約四千人其業經遣回弁兵雖據稟報起程尙未知果否回滇徘徊日久必致另生枝節等語前據駱秉章奏接張亮基函稱散遣悍練已十去其八何以畱紮瀘州者尙有四千人且張亮基前稱遣散練勇非銀五萬兩不可見在駱秉章已籌撥銀四萬五千兩並前撥銀二萬六千兩續撥銀一萬六千兩爲數甚鉅何以於散練一層尙屬茫無把握殊不可解川省軍務未竣頭緒紛繁若再將此股練勇激而生變貽患地方張亮基自問當得何罪此時昭通

一府雖尙安靜而大理等處杜文秀尙在負隅張亮基入滇後勢
非用武不能戡定滇練本係張亮基舊部因其窮而失歸籠絡以
安其心激勵以作其氣較之倉卒召募必更得力卽著張亮基潘
鐸妥爲辦理不得顛預貽誤至于重咎至林自清應否挈同回滇
仍著駱秉章潘鐸張亮基斟酌妥辦徐之銘屢欲阻遏兵勇入滇
疊經諭令潘鐸張亮基等詳慎偵探毋墮奸詐若能率萬餘滇練
使效前驅又有川餉足資沿途口食宣布朝廷威德正在此時該
督等務卽相機前進毋令事機之屢誤也駱秉章另片奏中瞻對
夷酋強占土司地方近復擾及明正邊界等語著駱秉章飭令都
司謝國泰同知張超前往剴切開導務令斂兵歸巢並著飭令該
處土司兵弁嚴扼邊隘以備侵軼將此由六百里諭令知之○諭
崇實駱秉章奏拉里等處糧員來稟接據前藏兵民公呈僉謂滿

慶信任私人受其愚惑爲布資綳寺喇嘛挾制擅起兵燹呼徵呼
圖克圖雖暫時出避後患方長各等語似此情形是滿慶等前奏
危而復安等語殊不足信必須持平辦理方能久遠相安本日已
降旨賞給福濟副都統銜著卽馳赴西藏會同景紋秉公查辦務
令兩造曲直各得其平庶足安黃教而靖疆圉至滿慶等辦理不
善情形及有無受賄情弊並著確切訪查據實具奏福濟屢經獲
咎此次委以邊疆重務該員具有天良想斷不敢粉飾贍徇自干
咎戾也將此由五百里各諭令知之○以唐訓方暫署安徽巡撫
閻敬銘署湖北布政使按察使署○戊辰諭內閣刑部奏發往新疆
效力之已革大員應否援免請旨一摺已革江南河道總督庚長
前因失守清江經刑部擬以斬監候當經奉 旨從寬發往新疆
效力贖罪茲據刑部奏稱庚長見在行抵陝西據瑛榮咨明該部

該革員事犯在咸豐十一年十月初九日恩詔以前應截畱查辦援免各等語庚長係因失陷地方罪應斬候從寬發遣之員雖事犯在恩詔以前著不准其援免仍發往新疆效力贖罪○追封

孝德顯皇后曾祖父原任刑部尙書明山祖父原任兵部員外郎祺昌均爲三等公曾祖母庫爾氏祖母那拉氏均爲公妻一品夫人○追封 慈安皇太后曾祖父原任陝西延綏鎮總兵官策普坦祖父原任西甯辦事大臣福克精阿父原任廣西右江道穆揚阿均爲三等公曾祖母扎庫他氏祖母覺羅氏母宗室氏覺羅氏生母姜佳氏均爲公妻一品夫人 慈禧皇太后曾祖父原任戶部員外郎吉朗阿祖父原任刑部郎中景瑞父原任安徽甯池太廣道惠徵均爲三等公曾祖母宗室氏祖母瓜爾佳氏母富察氏均爲公妻一品夫人○予直隸陣亡布政司理問李恆等世職

建祠○己巳諭內閣前因御史胡壽椿奏參山西臬司瑞昌等貪劣各款當經諭令愛仁王茂蔭從嚴查辦茲據愛仁王茂蔭逐加研詰定擬具奏此案暫革山西按察使瑞昌雖訊無貪婪實蹟惟當防務喫緊之際兌換多金致招物議實屬不知檢束著開復原官仍交部嚴加議處暫革候選道沈巢生雖訊無把持鹽釐實蹟惟以監司大員捏名充當商夥實屬有玷官箴著卽行革職暫革山西候補知府沈長材雖訊無買缺實蹟惟伊父沈巢生旣在山西開設鹽店該革員並不遵照新章聲明迴避著交部照例議處沈長材見在另有應行查辦案件其暫行革職處分著俟另案辦結時聲明請旨其訊無實蹟之山西冀甯道鍾秀代州知州陳國觀均著毋庸置議候補道穆克金布雖訊無貪緣改委各情惟是否不諳公事著英桂隨時畱心察看據實具奏山西巡撫英桂於

已發摺件輒行追回實屬不合著交部議處雁平道崇泰雖訊無
遇案索銀情事惟性喜宴安且年力就衰難期振作著以原品休
致○諭愛仁王茂蔭奏訪聞謀產斃命捏情誣節一案請交撫臣
督同藩臬研究確情等語山西太谷縣民婦員杜氏員楊氏謀產
爭繼一案前經巡撫英桂奏結茲據愛仁等將全案卷宗逐細查
閱其中疑竇甚多卽如員何氏攔驗員楊氏屍身時並無接生之
田車氏迨提省時忽添出田車氏顯係隨後賄串作證楊氏如果
因產身死前任知縣沈長材已赴屍場何以不行驗明攔驗者係
死者之仇家與年甫十七之屍弟又何以率准攔驗且楊學正係
楊氏堂兄如有姦情楊氏因產身死楊學正罪名出入攸關更無
不驗明之理此案係沈長材任內之事何以提省時仍令該員承
審其五年立繼爲員崇鼎承祧之案何以率請撤銷此案杜氏楊

氏涉訟多年覈其肇釁之由卽係杜氏欲以伊子雙祧而楊氏不願所致嗣楊氏忽死杜氏卽以私產等情呈請批銷待繼之案以遂其吞產之私種種情形顯而易見業經愛仁等訊據楊氏僕婦曹武氏等供明嬰孩係杜氏家僕婦送來意圖污壞楊氏名節是謀產誣節等情已有端倪不難水落石出著英桂督同藩臬兩司親提人證卷宗秉公嚴訊確情按律定擬具奏以成信讞不得因係已結之案稍存回護○諭議政王軍機大臣等譚廷襄奏添兵會擊擒匪並蘭費勦匪堵禦敎匪情形一摺擒匪由魚臺隄濠竄向西北一路僧格林沁派色爾固善追及魚臺西北及金鄉交界之羅家寨等地方譚廷襄旣稱此軍與賊接仗又稱仍行撤隊回紮魚臺究竟曾否獲勝抑係未經得手並未明晰聲敘著將接仗情形詳細具奏見在該匪大股擾及嘉祥逼近濟甯一經竄渡運

嚴飭在事各員實力堵剿毋得有名無實致滋貽誤運河防堵一
節尤爲緊要關鍵所有沿河及南陽等湖船隻均須提歸東岸並
激勵團勇齊心守禦毋令賊蹤偷渡是爲至要東昌一帶接壤大
名並著調集鄉團扼賊西竄一面知照遮克敦布一體堵禦以杜
賊竄畿南之路毋稍疏忽蘭費一帶股匪捻首王廣繼並未殲除
本境土匪尙多著卽飭令德楞額並該撫派出之遊擊緒綸等迅
速剿除毋再延緩鳳凰山教匪時慮乘間突出該撫務宜嚴密布
置力遏要衝俟勇隊到齊卽分道進攻務須擒渠擣穴不得因鄒
曲一帶隊伍單薄致令乘虛出竄擾及山外完善地方將此由六

百里諭令知之○申諭勞崇光迅解京餉○庚午諭議政王軍機大臣等有人奏黔省之事壞於田興恕偏任謝葆齡張心培錢登選冷超儒趙國澍吳德溥朋比爲奸自韓超接署撫篆所任用者仍屬謝葆齡等六人韓超之幕友陳昌運籍隸貴州則爲之改籍貫委署思州府篆習教王雲以船戶捐知縣而委署銅仁府王雲到任挾仇擅殺團首向姓致團眾不服勾匪犯境署遵義縣于鍾岳素性誇誕韓超引爲心腹不用司詳輒委兼署綏陽桐梓等縣並辦婺川等處軍務于鍾岳任意苛斂幾致激成民變至黔省抽釐章程名爲釐穀實通省按糧按畝十取其一上年收至四十餘萬兩不知消歸何有其委出官紳率倚勢殺人於十一抽釐之外私加至十之四五民間稍有不遵卽刀割其鼻用繩穿孔魚貫游街示儆上年十二月間清鎮縣委員張鍾元錢恭以此刑毒百姓

致激成磔殺委員搶毀釐局之舉韓超猶爲之彌縫其事僅以民
國報仇入奏其餘任性妄爲不可枚舉請飭查明懲究等語謝葆
齡等聲名甚劣曾據駱秉章遵查屬實而該署撫覆奏則稱謝葆
齡張茂萱錢登選冷超儒皆係黔省得力人員於趙國澍一員則
稱其嫉惡如仇不徇情面今謝葆齡等又爲人所彈劾是韓超一
味袒護已屬顯而易見其任用非人苛派斂怨等款更難保其必
無黔省軍務未竣田興恕已貽誤於前豈容韓超復貽誤於後著
崇實駱秉章勞崇光彙入查辦田興恕案內將韓超被參各款確
切查明據實參奏不准稍有回護原片著鈔給閱看將此由四百
里各諭令知之尋勞崇光等奏遵查韓超有心求治而才短於慮
事識闇於知人其開脫謝葆齡等參款因愛其才而昧其短其委
于鍾岳兼署三縣亦志在用才而不慮其不能兼顧應請交部議

處謝葆齡張心培見因另案奏參王雲先經韓超參革趙國澍已
勦賊陣亡錢登選等查無實在劣蹟且才皆可用請免置議並送
部引見從之○辛未曾國藩奏僞保王童容海率眾乞降襲取廣
德州城臣本擬酌畱二千人餘悉遣散旋據鮑超來文童容海既
取州城襲殺守賊僞閩天義馬桂功並收其眾一律薙髮不下六
七萬人請多畱降卒立爲啟化營以資攻剿並轉據童容海自陳
本係洪姓請卽更正等情臣以洪容海自拔來歸應准復還本姓
惟所部過眾因令挑畱三千人編立五營餘悉遣散飭總兵宋國
永已革知府曾詠妥爲辦理各繳軍械發給護照川資擇其明幹
頭目帶領由陸路分起回籍果能沿途約束一無滋擾俟該頭目
等同營准其錄用准予保獎當不至變生意外至洪容海數年被
擄一旦自新乃能計取堅城襲殺守賊力圖晚蓋非假以虛名恐

不足馭下合無仰懇 天恩賞給洪容海遊擊虛銜其部下頭目一併開列請分別賞給五六品頂戴俟續有勞績由臣分別奏保官階使悔罪投誠者知朝廷有倖邀之寬典無顧惜之功名則東南逋寇或皆聞風知勸瓦解冰消矣 上諭內閣洪容海身陷賊中數戰既能自拔來歸復能率眾效力計取堅城襲殺守賊足見其從前被賊所脅並非甘心從逆此次奮勉立功不無微勞足錄洪容海著賞給遊擊銜以示獎勵此外爲賊逼迫勉強脅從者正復不少果能悔罪投誠獻城自贖殺賊立功各該督撫及各路統兵大臣卽不准過事苛求一經奏聞無不予以自新恩施立沛也

○諭議政王軍機大臣等寄諭欽差大臣僧格林沁前日伯彥訥謨祜自軍營回京召見時詢悉該大臣腕恙尙未就痊殊深厯念該大臣以軍務方殷未敢遽行請假足徵以國事爲重力疾從公

並聞所部兵勇除調出追剿擒匪外畱營不過數百甚爲單薄儻擒匪由夏鹿一帶乘虛撲犯恐其存營兵力不敷守禦亦必當謀出萬全勿令擒匪乘間窺伺方爲妥善將此諭令知之○曾國藩奏臣 疊奉諭旨垂詢各路軍情謹就聞見所及分條具陳一多隆阿一軍初克廬州時臣 本欲其會攻金陵不料陝西告警官文等奏請多隆阿率師援秦而諭旨亦飭令先保陝西臣 雖覺金陵兵單事機可惜然以秦晉爲餉源所出未敢奏調多隆阿西援之師轉而東征也厥後粵逆回竄秦事稍鬆而漢回讐殺望援仍切其時甯國已克南岸兵力足敷調遣臣 因咨達多隆阿不必回顧蘇皖或速剿陝省或畱駐河南請其定計嗣多隆阿軍抵襄陽由光化荆子關入秦本不至爲南陽之賊所阻南陽賊匪經鄂軍會剿解圍亦尙不至爲楚疆之患勝保前次奏報殊未確實致朝廷久

經派定援秦之局又復中變多隆阿接奉毋庸入陝之旨不知從何處折回若已抵秦境則進退兩難若果回鄂疆自當遵旨駐紮南陽一帶食鄂省之餉擊豫省之賊凡有竄入南汝兩府者責成多隆阿攔截痛剿西可屏蔽秦中南可保障楚省北可聯絡鄭元善葉裕之師東可聯絡蔣凝學潁州之師誠爲一舉而數善皆備至於防守廬州石清吉本係多隆阿部將不須該將軍前往駐守圍攻金陵鮑超已定由東壩前進不須該將軍遽往會剿誠以鄂豫秦三省交滙之區不可無大枝勁旅爲遊擊之師非謂江南不必添兵也一裏下河一帶屢屢聖懷江南之賊若由常熟江陰偷渡北岸之靖江如皋通州海門等處實屬防不勝防頃接李鴻章咨稱探得僞輔王楊輔青自甯國敗回僞護王陳坤書自揚州敗回均至蘇城與僞忠王商議金陵危急皖浙官軍分路進剿上

游已無路可竄欲分大股由江陰福山楊林各口窺竄江北裹下河就食完善之區等語李鴻章已奏請飭都興阿黃彬等嚴防以臣愚見都興阿兵力祇有此數紅單船勇丁不甚可靠至江北應防要地尙無專汛派防之水師臣見咨商楊岳斌屬其親赴下游徧歷靖江如皋通州海門數百里江面察看要衝妥籌布置又擬令太湖水師造船一百六十號防剿上海松江由澱湖以入蘇州而以黃翼升水師專防淮揚裹下河一帶星夜趕辦計四箇月可以集事目下太湖水師尙未辦就黃翼升不可離滬所有裹下河之防應請飭都興阿黃彬引爲專責臣亦當力籌兼顧仍請飭下僧格林沁吳棠如賊果竄裹下河卽於清江浦嚴兵以待此等敗殘股匪不難一戰殲之一李世忠一軍前奉諭旨歸臣節制調度查李世忠投誠之初勝保奏明准帶一萬八千人實數蓋近三萬

近又陸續增至五六萬於長淮五河等處設釐卡數處長江新河口設釐卡一處各縣亦有卡局所獲頗厚又廣運鹽斤自捆自賣相沿已久非另籌鉅款按月供支以養其眾勢難驟繩以法且去冬今春克復天長六合浦口江浦擊退陳坤書股匪於大局不爲無功未可沒其勞而遽議其後臣擬姑循其舊至該軍餉需專盼粵東釐金聞晏端書到粵事多掣肘若該省釐金不能大有起色不特皖浙欠餉無出卽李世忠一軍亦難籌接濟一鎮江一軍前奉諭旨飭臣統籌兼顧頃馮子材函商一切臣覆函以鎮江餉絀兵單祇宜固守不宜出戰待鮑超攻克東壩溧陽溧水句容等處屯駐金陵之東北能與鎮江聯絡一氣不爲賊氛所梗屆時馮子材再行撥兵會剿庶幾聲勢聯絡士氣易奮至李鴻章久有移紮鎮江之意無如松滬一帶戰爭不休觀忠逆之志似欲甘心於滬

上李鴻章有萬不可離滬之勢或俟太湖水師辦成李鴻章卽統水陸諸軍由松滬進兵入蘇亦屬因利乘便之法所有鎮江防剿應始終責成馮子材耐苦堅守不作出剿之計以上四條臣勉竭愚慮未審當否又奏近日金陵賊匪未撲官軍營盤曾國荃因營中病勇過多亦未進攻鮑超克復甯國已逾月餘見值天氣稍涼卽當催令進兵左宗棠在浙亦苦營中患病者多未甚得手僞侍王李侍賢見在金華修城治濠並調溫處之賊萃於該郡爲死守計龍游縣城雖已檄調劉培元等軍進攻該處地勢平衍難以偏城立營一時未能速下蔣益澧一軍七月十六日已入江西萍鄉縣境日內當可陸續抵浙 上諭曾國藩奏疊奉諭旨分條覆奏及歷陳近日軍情各摺片多隆阿援陝之師自廬州拔營後兩月未見官文等奏報是以改派勝保督辦陝西軍務嗣因多隆阿有

入陝消息復諭令勝保專辦渭北多隆阿專辦渭南見在勝保已抵臨潼多隆阿亦可到西安俟陝境回匪剿平後卽著照該大臣所擬令該將軍駐紮南陽一帶俾鄂豫秦三省交匯之區得此大支勁旅於全局甚有裨益曾國藩探悉僞輔王等有句結盜匪偷渡江北之意已嚴飭都興阿等督率水師實力防守並令吳棠嚴軍以待僧格林沁所部馬步各隊分剿皖豫山東數省捻匪已屬不敷調遣恐難再撥勁旅駐守清江仍諭令該親王審度機宜妥爲籌辦裏下河尙稱完善該逆垂涎已久都興阿之兵力止有此數紅單船之勇丁不甚可靠萬一楊輔青等股敗賊率眾渡江該大臣務當力籌兼顧毋稍大意曾國藩見派楊岳斌親赴下游察看江面衝要著卽飭令妥籌布置太湖水師戰船辦成後卽令黃翼升一軍專防淮揚裏下河一帶所籌均合機宜著卽妥爲籌辦

至所稱李世忠自投誠以後據有城池自爲風氣添設釐卡廣運鹽斤上侵公家之利下爲商民之害殊切隱憂必須另籌鉅款按月供支足以養彼之勇乃能行吾之法等語已寄諭勞崇光晏端書將粵東釐金迅速妥辦昨據馮子材奏逆匪撲犯鎮防當經諭令馮子材以守爲戰不可懸軍深入本日曾國藩奏稱鎮江餉缺兵單止宜固守不宜出戰與寄諭適相脗合仍著曾國藩隨時授以機宜以期萬全無失近據李鴻章奏蘇城大股逆匪攻撲青浦滬防萬分喫緊是李鴻章一時斷難移軍赴鎮該大臣權衡緩急自不必拘泥前議致誤事機浙省逆匪以全力扼守金華官軍進攻龍游尙難得力昨因有人條奏甯郡克復徽郡救安宜飭駐徽將領規取嚴州等語已諭該大臣酌辦見在廣德州城又經收復徽防更可無虞著該大臣飭令張運蘭迅速督率兵勇攻取嚴郡

則左宗棠進取之師較易得手將此由六百里諭令知之○諭曾國藩奏接李鴻章咨稱探悉僞輔王楊輔青僞護王陳坤書均來蘇城與僞忠王商議欲分大股窺竄裏下河就食並厯陳鎮江一軍見今止宜固守不宜出戰各等語裏下河防堵關繫緊要疊經諭令都興阿嚴密防範見在楊輔青陳坤書及青陽古隆賢等三股敗賊窮無所之圖竄江北該處港汊紛歧守禦萬分喫緊聞江面水師近來不甚得力而新調之紅單船四十號據曾國藩奏已在廣東省河爲颶風所壞都興阿有督率軍務之責亟宜實力整頓以備不虞著嚴飭黃彬等督率水師各營將沿江衝要處所不分晝夜逐段梭巡如巡防不力致該逆偷渡北岸擾及裏下河完善地方定將黃彬等按照軍法治罪揚郡近已肅清都興阿所部陸路各軍並著勤加訓練嚴明紀律或於江陰各口對岸嚴兵以

將策應水師俾逆匪無隙可乘方爲妥善鎮城孤立江濱節經諭
令馮子材審度萬全以守爲戰著仍遵前旨妥籌固守俟鮑超攻
克東壩深陽等處再行督兵會合進剿與鮑超等聯絡一氣則聲
援四應攻剿當可得手將此由六百里各諭令知之○諭勝保奏
督隊馳抵臨潼適遇大股回匪迎撲官軍奮力剿殺大獲全捷並
十四日續獲全勝各摺片勝保懸軍深入兩日之內疾馳二百餘
里猝遇大股悍回以少擊眾疊挫兇鋒剿辦尙屬認真該大臣見
擬令各軍屯紮臨潼自率偏師由間道先赴省城與瑛棨面商調
度機宜自係尙未接奉疊次所寄諭旨逆回狡詐異常若偵知勝
保已離軍營以全力攻撲畱屯營盤則兵分力單回顧非易馬德
昭護送薪炭之敗前車可鑒查閱逆回馬德友供詞內有欲攻破
同州西安以爲根本之語足見賊意並注朝同一帶該處逼近晉

驅逆回垂涎已久山西防兵又復單弱若大軍一意西趨必致逼賊東竄勝保一軍反成尾追之勢於大局殊有關繫本日據成明奏朝邑危急雖有勝保撥來馬步七百名仍不敷守城之用著勝保仍遵前旨迅卽折回同州將王閣村等處巢穴悉數掃蕩務令拔其根株以漸解散勝保奏雷正綰一軍已抵藍田遙計日內多隆阿必行抵陝省著將西安省城及渭南一帶戰守機宜妥爲籌畫並督飭雷正綰等奮力勦洗不得因勝保在陝稍存推諉至回逆一經懲創難保不作西竄之計著多隆阿瑛棨熟籌審計妥爲防範將此由六百里各諭令知之○諭張亮基奏遣散練眾分起給賞回滇又有後起練眾萬餘人意欲來蜀就食均經阻止等語林自清所帶練眾旣未遣散又有各起滇練陸續而來川省軍務方殷豈容練勇疊次滋擾該前督於遣練一節辦理毫無把握且

行抵重慶四月之久尙未定期赴滇其玩誤取巧之心已可概見
著潘鐸張亮基將練眾速行安置迅卽赴滇不准藉詞延宕後起
滇練飭令折回儻闌入川境惟張亮基是問張亮基奏請畱兵練
二千交林自清管帶畱川是否可行著駱秉章斟酌妥辦如恐其
僨事卽著張亮基帶令回滇勦辦大理股匪林自清係該前督舊
部旣不能策令勦賊又不能妥爲籠絡屢次瀆請畱川希圖委卸
是誠何心駱秉章先後給過川資已有八萬七千兩之多此次張
亮基又收重慶紳糧捐銀一萬五千兩爲數已屬不少當趕緊設
法散遣催出蜀界勿致貽誤鄰封參將張陞是否可以畱營並著
駱秉章酌量辦理將此由五百里各諭令知之○壬申李鴻章奏
僞募王譚逆率醜類繞出青浦縣直撲北新涇營七月二十六日
後復添僞主將蔡姓黃姓兩大股蔓延二三十里不下十萬眾況

文榜等併力抵禦屢被包裹塞斷後路援兵不能遽達八月初一日賊用稻草填濠我軍火器齊發然燒稻草斃濠中悍賊百餘初二日賊眾四五萬更番疊撲都司張榮發苦戰受傷勢甚危險臣先經密商臣弟李鶴章傳諭青浦及北簞山鳳凰山塘橋各營各帶五成隊伍急趨泗涇七寶鈔賊之後臣親督上海老營七成隊伍與程學啟等約期會戰於北新涇並調浦東各營來援程學啟是日行抵七寶譚逆遂大隊擁至圍裹數重我軍奮力鏖戰該逆大敗狂奔追殺十餘里生擒四百餘名斬斃淹斃三千餘名賊夜遁野雞墩與蔡黃逆眾仍圍新涇初三日臣督帶各隊與程學啟等會於北新涇營外隨派隊分三路進剿程學啟滕嗣武郭松林馳入況文榜等營中各隊鼓勇爭先踏毀賊營十數座賊皆逃過吳淞江北岸副將華爾帶常勝軍在法華接應署提臣黃翼升聞

警卽督水師由吳淞江進擊與敗賊相持至夜四鼓礮聲如雷轟斃數百名又踏毀北岸賊營七座賊乃退去初四日我軍撤回譚蔡黃各逆又率眾回撲北新涇適參將劉銘傳等帶隊赴援衝至野雞墩殺賊無算初五日追過南翔賊已退向嘉定而去滬防肅清查譚逆糾黨窺竄上海計極狡毒況文榜等守北新涇七晝夜屹未動搖賊不敢舍之深入而程學啟諸將神速赴機水陸中外各軍復合力追剿滬防危而復安況文榜係應解皖省訊辦之員甯滬以來屢經大敵身受礮傷實屬異常出力可否籲懇 天恩免其重譴甯營差遣 上諭議政王軍機大臣等李鴻章奏北新涇團滬防肅清一摺逆匪垂涎滬上已非一日見雖被創遁歸難保不去而復來李鴻章務宜督飭各營將士分布要隘嚴申警備毋令逆蹤再行竄入方爲妥善前因鮑超一軍擬由東壩溧水

進攻金陵南路諭令李鴻章於攻克青浦時撥兵西攻蘇郡便可與鮑超東下之師聲勢相接該撫可卽隨時咨商曾國藩爲籌畫進攻蘇城之計步步移營以剿爲防與鮑超東下之師兩路夾攻使賊匪備多力分自不至併向東趨致松滬各防爲所牽掣也另片奏湖州失守情形趙景賢被執不屈大節凜然見尙被賊羈禁蘇城仍著該撫隨時密探情形具奏將此由六百里諭令知之○諭各省迅解定陵工程餉銀○予浙江殉難翰林院編修張洵世職○癸酉諭內閣前因給事中郭祥瑞奏參山東萊州府知府王鴻烈貪酷各款並其子王祥麟包攬公事各情當交譚廷襄從嚴查辦茲據奏稱王鴻烈並無嗜酒廢公情事其子王祥麟亦無包攬公事確據惟王鴻烈當捻蹤紛竄之時輒因六十壽辰聽從親友演戲爲賀高密縣知縣周用霖於南捻甫退之時輒因母病

愈演戲酬神均屬不知大體請將王鴻烈周昂霖分別交部議處
王祥麟免議各等語辦理甚屬輕縱譚廷襄身任封圻於屬員劣
蹟平日既漫無覺察迨經有人參奏交該撫從嚴查辦猶復偏聽
委員一面之詞彌縫粉飾化有爲無爲見好屬員地步且此案係
咸豐十一年奉 旨交查之件逾年始行覆奏亦屬任意稽延殊
堪痛恨此案山東萊州府知府王鴻烈於防務喫緊之時輒聽從
親友演戲且以劣蹟多端致登白簡平日居官不職已可概見該
撫僅請議處不足蔽辜王鴻烈著卽革職勒令帶同伊子王祥麟
卽行回籍不准在山東逗遛高密縣知縣周用霖於捻蹤甫退輒
在寓演戲酬神該撫所擬將該員交部議處亦屬過輕周用霖著
交部嚴加議處近來外省惡習遇有御史參奏屬員其劣款較重
者往往意存消弭僅將無足輕重之款尋求一二以爲塞責地步

相習成風牢不可破不知屬員恃有上司徇庇復何所忌憚而不爲豈朝廷委任疆吏整飭百僚之意耶譚廷襄狃於積習已將其定擬過輕之處從重改定姑免駁令再奏嗣後遇有交查事務須秉公據實陳奏不准一字欺飾各該省督撫均有稽查僚屬整飭地方之責務各力矢公忠勿蹈此等惡習將此通諭知之○諭議政王軍機大臣等本日據多隆阿奏楚軍回豫勦辦粵逆調撥廬營赴楚並瑛瑩奏鳳翔被擾請飭勝保多隆阿分辦陝省軍務英桂奏皖捻逼近晉境請飭多隆阿迎截各摺片覽奏曷勝焦急粵捻數萬直撲浙川廳城並擾及荊子關一帶石達開餘黨又由四川竄據竹山竹谿等縣粵捻大股又欲由荊子關一路先竄鄖陽句結二竹逆匪進攻興安府城以冀聯絡漢中之賊直赴西安多隆阿見因兵力不敷擬調廬郡所畱四營會合攻勦惟廬郡相隔

遙遠未能卽時趕到多隆阿自應就見有兵力扼要截擊毋令該逆竄入鄖陽與二竹漢中各股匪合併致滋蔓延雷正綰穆圖善兩軍及義中等營既經多隆阿檄令折回商南荆子關並分馳鄖西進剿著多隆阿卽督飭諸軍迅將此路逆匪掃除淨盡所有陝西平利竄匪及武關防堵事宜亦著多隆阿妥爲兼顧雷正綰一軍如尙未折回商南卽著畱於西安爲勝保聲援以便分剿鳳翔等處之匪官文前已派何紹彩一軍馳赴鄖陽著卽飭令與多隆阿兵勇會合夾擊並著飭令金國琛梁作楫所部兵勇分投迎擊以防賊蹤竄入所有多隆阿營糧餉軍火卽著官文嚴樹森源源接濟毋令缺乏石達開股匪見在川南敘永一帶何以遽越二千餘里竄至鄖陽著官文駱秉章查明具奏漢中股匪雖經毛震壽剿辦見又有由川續到滇匪郭刀刀一股竄入平利縣境賊多兵

少勢難兼顧著駱秉章速行添兵馳赴漢南會剿不可稍分畛域至陝省鳳翔一帶復有回匪紛紛起事並句結甘肅省悍回兇燄甚熾勝保計此時已達省垣軍情旦夕變遷多隆阿見將改赴楚省則剿辦陝回軍務卽係勝保專責應由何路進兵著與瑛棨妥商辦理涇陽被圍日久亦應先往解圍鳳翔賊匪初起撲滅尙易如能添撥兵勇令馬德昭剿辦亦可獨當一面均著勝保相機酌辦同朝一帶仍宜兼顧籌防毋令竄撲晉省姜台凌大股捻匪竄至陝州與晉省僅隔一河屢經搶渡經該處防兵擊退晉省蒲州一帶西防回逆南防捻匪隘口分歧到處喫重英桂所請多隆阿由潼關直趨陝州之處見在情形斷難照辦英桂務宜督飭在防文武加意嚴防毋稍疏懈潼關毗連陝州爲勝保一軍後路並著勝保瑛棨飭令哈連升嚴密扼守毋令賊蹤闖入前因皖匪毫捻

及張落刑大股西竄諭令鄭元善剋期出省馳赴洛陽該撫於賊
攻南陽時藉詞監臨入閤置緊急軍情於不顧並以敗殘餘匪不
難殄除飾詞入奏該撫安坐省垣於各路防剿情形毫無布置以
致粵捻各逆紛竄西南晉陝楚防同時喫重實屬畏葸取巧深堪
痛恨著卽懷遵疊次諭旨督率洪貞謙剋日出省並調集楊飛熊
楊長春盧得勝及李續燾各軍迅赴河洛將此股捻匪痛加剿除
毋畱餘孽該撫旣已貽誤於前儻再觀望不進致令蔓及晉陝自
問當得何罪該撫前奏洪貞謙卽日出省見已將及一月未據將
出省日期奏報尤屬顛預可惡著卽行查明如果遲延不進卽遵
前諭嚴行參處僧格林沁所派恆齡一軍見在追賊行抵何處著
僧格林沁查明具奏並飭令恆齡實力剿捕毋稍鬆勁鄭元善出
省後省城空虛恐毫捻回竄著毛昶熙回防省垣並著僧格林沁

隨時兼顧將此由六百里加緊各諭令知之○諭常清等奏哈薩克布魯特移近卡倫稟求內附派員諭遣回牧一摺並照譯哈薩克等稟詞呈覽哈薩克布魯特部落散居邊外族類日繁自來首鼠兩端向背靡定此次於兩國分界未經會議之先相率入卡求給近地遊牧如果實因俄國苛派不堪萬難在卡外居住何以上次俄國兵練滋擾卡倫哈薩克布魯特之人亦隨同助力且經該將軍等開導遂卽弭耳帖服領賞而去並無執意堅求入卡情事種種均屬可疑該將軍等所稱恐將來以納叛啟釁固屬甚是尤恐爲俄人唆使潛入卡內窺我動靜不可不防著常清明緒卽行查明未行移回者尙有若干戶飭原派委員及總管等善言開導固不容輕易存畱致啟覬覦之漸亦不得辦理操切或阻向化之誠至出卡後情形若何並著隨時探明具奏另片奏伊犁河工修

竣數計收款用款何以數目前後不符其中恐有別項情弊著卽行徹底詳查據實具奏將此諭令知之尋奏哈薩克布魯特均已移出卡外游牧見居大雪封山尙不至有潛行入卡情事河工用款因借資民力得有贏餘節省之錢畱作歲修經費經手各員回堂稍遲尙無別項情弊報聞○予山東陣亡署總兵官郝上庠副都統舒明阿建祠○甲戌諭內閣本年九月初九日朕奉 慈安皇太后 慈禧皇太后恭送 文宗顯皇帝暨 孝德顯皇后梓宮奉移 山陵業經諭各衙門敬謹豫備誠以 顧復深恩 昊天罔極卽躬親執紼哀戀亦曷能已茲據王大臣等奏恭引康熙二年奉移 世祖章皇帝寶宮前往 孝陵諸王大臣援引古禮 顯止 聖祖仁皇帝躬親遠送僅於東安門外奠酒成案酌經從權合詞籲懇恪遵 成憲暫停恭送一摺我兩宮 皇太后重念

鉅典撫朕藐躬披覽之餘倍增哀愴朕奉 慈安皇太后 慈禧
皇太后召見議政王奕訢軍機大臣文祥寶鋆曹毓瑛惠親王綿
愉惇親王奕訢醇郡王奕譞禮親王世鐸豫親王義道睿親王仁
壽肅親王華豐順承郡王慶恩御前大臣景壽奕山貝子載容大
學士祁寯藻翁心存協辦大學士倭仁尙書倭什琿布萬青藜趙
光李蒞左都御史李棠階侍郎張之萬崇綸靈桂侍講李鴻藻等
欽奉 懿旨諭以典禮攸關衷懷愴惻愾聞僂見夙夜何安凡在
臣工亦宜共諒復經王大臣等殷殷籲懇以朕沖年踐阼同符
聖祖 實錄所載彝典昭然膺 文宗顯皇帝付託之重允宜勉
遵 祖制暫停親送情詞懇切出於至誠我兩宮 皇太后悲不
自勝勉從諸王大臣所請用以仰承 先志俯順羣情惟敬念
靈輿在道不復躬親夙夜兢兢負疚滋甚其如何遣近支親王恭

代之處及一切應行典禮著該衙門詳查具奏○復各省駐防文
生員繙譯生員鄉會試例○丙子諭議政王軍機大臣等譚廷襄
奏馳赴濟甯剿辦南捻經僧格林沁督軍大獲勝仗見仍折回兗
州遮克敦布奏撥兵防剿並見辦情形各一摺南捻突入東境屯
聚金嘉交界之陽山滿家洞一帶意在渡運北犯譚廷襄以濟甯
地方緊要親往該處加派隊伍前赴長溝守禦旋據報稱僧格林
沁親督大軍於十七日馳抵城武二十日在金山以東列仗斃賊
七八千名見在南跟追辦理甚爲妥速著僧格林沁卽飭派出
將弁將此股賊眾殄除並將匪首胡四季成等設法擒獲仍將接
仗獲勝詳細情形迅速奏聞以慰厯念譚廷襄業經馳回兗郡卽
將鄒泗一帶教匪實力防剿無任肆行出掠其應如何添兵剿辦
之處著俟僧格林沁將此股南捻剿完會商妥辦以期早日蕆事

遮克敦布奏擬將西安馬隊四百名撤回請調外火器營馬隊二百名並添募馬勇二百名各等情外火器營馬隊係爲京營操防之用豈能任聽各軍營紛紛調撥所奏著不准行至添募馬勇一層如果認真訓練原可資以剿賊但恐奸匪溷迹必當嚴密查察西安馬隊儘可擇其得力者畱於軍營不必概行遣撤大名等屬騎馬賊匪尙未一律剿除著訪明窩集處所直擣巢穴以淨根株將此由六百里各諭令知之○諭勞崇光奏遵將被參各款據實覆奏一摺勞崇光疊次被參各款前經派人查奏均稱事出有因復以該督前在廣西辦理軍務有年尙能堅忍耐苦且因其久膺疆寄受恩至重料其不敢回護因寄諭勞崇光自行據實覆奏茲據奏稱升任粵督事處萬難不得不通權達變是以破格違例稍踰繩墨之處誠所不免或思慮未審辦理未妥及覺察未周受人

蒙蔽者亦不能無旣被指參自應覈實辦理茲將被參各款逐一
分晰據實開單呈覽等語閱其自陳各款內有自認事非無因遵
卽分晰辦理者亦有謂原參指陳失實細加查訪並無其事者其
有其中情節姓名原參俱屬舛錯自不得以被劾在前謂其自陳
各款皆屬文飾亦不能以該督一面之辭遽可信爲全無隱遁晏
端書在粵東辦理釐捐事件崑壽久任粵東專閫見聞自必較眞
著卽會同將該督被人原參查覆及所自陳各節秉公嚴密按款
覆查據實具奏不准一字扶同徇隱及意涉偏袒諒該副都御史
提督亦斷不敢以代人受過自甘罪戾也原參查覆各摺片並勞
崇光所奏摺單均著鈔給閱看崑壽勞崇光聯銜具奏將陶昌培
等拏獲正法一摺內勞崇光所請交部嚴議之處著俟覆奏到時
再行聲明請旨將此由五百里各諭令知之○諭勞崇光奏遵將

被參各款據實覆奏並將革弁陶昌培等正法各摺覽奏均悉陶昌培本一首民不知自檢重干罪戾該督誤加任用自奉諭旨尙能妥密拏獲正法其自請交部嚴議之處仍著暫行候旨另片奏粵東省城及近省地方颶風暴雨爲災甚厲各情天災滋懼民瘼攸關該督務飭所屬悉心查辦毋令災民流離失所且恐流而爲匪高州軍務近日辦理若何著督飭各該將領及地方文武迅籌攻剿早期肅事仍著將剿辦情形具奏將此由五百里諭令知之○丁丑諭前因捻匪大股西竄當經寄諭鄭元善剋日出省迅赴河洛剿辦茲據鄭元善奏縷陳捻股分竄官軍剿擊獲勝並派隊布置擬出關後親赴河洛督辦李續燾一軍見在未便札調各摺片豫省各路地方任賊紛竄雖據該撫奏稱楊長春戰於汝境盧得勝戰於裕州均未大加剿洗僧格林沁派出之恆齡等博望驛

一戰稍挫兇敵又未能乘勝追剿如果盧得勝有不遵恆齡遣調藉詞推諉致誤軍情卽著鄭元善查明嚴參懲辦該撫監臨外間事竣著卽懷遵疊次嚴諭迅赴河洛督飭諸軍速籌剿辦何路緊急卽親往何路策應粵逆大股已越浙川而奔荆子關欲竄鄖陽句結由川竄擾二竹股匪以犯陝境勝保到陝後多隆阿卽可暫紮商南居中調度昨有旨飭令督率諸軍將欲竄陝省之豫捻認真堵剿兼顧陝西平利竄匪及武關防堵事宜勢難復顧南陽宛南軍務仍著鄭元善嚴飭洪貞謙等實力剿辦陝西竄賊並著該撫行抵河洛趕緊籌剿如令紛竄秦晉兩省以鄰爲壑定惟該撫是問李續燾一軍見在信陽攻剿龍井難以檄調卽飭豫省官軍會合連將龍井剿平進攻明港以通驛道將此由六百里諭令知之○命總兵官黃開榜接統田在田軍○戊寅諭議政王軍機大

臣等前據慶端奏耆齡行抵浦城將閩省援浙各軍移交接統茲據耆齡奏疊次婉商撥勇會剿慶端堅執不允總兵秦如虎等並不遵調前赴湯溪號令分歧鎮將無所適從恐滋貽誤等語慶端於耆齡到浦後卽有將援浙兵勇移交接統之奏何以耆齡與該將軍籌商進剿慶端未能和衷殊不可解耆齡身任兼圻責無旁貸著檄飭閩省援浙各路兵勇統歸該督調度以一事權惟慶端自出省防剿以來克復郡縣不少此次又克處州並能固守閩疆不被該匪竄擾不得謂其所辦盡屬非是今耆齡旣稱意見不符所有援浙軍務卽專責耆齡督辦毋庸慶端贊襄調度如耆齡久而無功較之慶端尙有不逮必當重治耆齡之罪勿謂寬典可幸邀也至耆齡奏軍營積弊亟宜力圖整頓革員廖士彥等所帶練勇旣查有虛名冒餉情弊著卽徹底根究從嚴參辦閩省兵勇援

浙屢克城池奮勇善戰者諒亦不少如林文察秦如虎等尤爲慶
端部下得力之將該督將廖士彥秦如虎張銓慶等所帶練勇概
行遣散慶端本日亦經陳奏第閩省兵勇裁汰過甚該督所恃以
衝鋒殺賊者勢不能全仗廣永康國器亦非超羣出衆之材廣勇
多强悍不法且往往有通賊情事耆齡膺茲重寄務當籌畫萬全
毋得意存成見謂閩勇盡不可用任令廣勇恣意橫行轉致不可
收拾台州等郡甫經克復亦須加意守禦紳士蘇鏡蓉等亦必須
設法籠絡俾士民鼓舞樂爲我用左宗棠巡撫全浙耆齡督軍前
來專爲援浙溫處等郡軍情左宗棠仍應主持其事如有與耆齡
會剿之處務當隨時商榷以期互相策應並著將閩省援浙軍情
據實陳奏其處州餘姚克復詳細情形著耆齡左宗棠迅速查明
具奏據慶端奏洋盜顏馬登等投誠充爲水勇擒獲盜匪多名懇

請免其治罪並著耆齡左宗棠查明如果真心悔悟立功自贖卽
著飭令支方廉妥爲安插毋令滋生事端臺灣彰化縣會匪以縣
城爲巢穴分股圍撲嘉義縣城官軍分路攻剿城圍立解並攻復
大甲土城曾玉明督同官兵義勇進軍彰化接仗數十次疊獲全
勝耆齡徐宗幹嚴飭各路帶兵將領迅解斗六之圍剋日攻取
彰城務將此股匪徒悉數殲除勿畱餘孽總兵林向榮遷延不進
坐耗餉需亦經降旨暫行革職仍責令會合嘉彰兩縣士民聯莊
堵剿以觀後效延屬地方每值採茶之際棚民麇集最易滋事此
次順昌境內民人械鬪起釁著徐宗幹妥爲查辦毋任釀成巨案
九龍山匪首李阿四等竄距沙縣順昌兩縣交界之八字橋一帶
經通判饒步程等迎擊斃匪多名李阿四受傷脫逃匪徒尙潛匿
山谷並著耆齡徐宗幹責令帶兵文武跟蹤接捕以期擒渠掃穴

悉拔根株將此由六百里各諭令知之○諭毛鴻賓奏官軍防剿
黔匪疊獲大勝並籌辦粵西股匪情形一摺黔匪首逆姜映芳糾
約苗教各匪襲距青谿經毛鴻賓飭令副將趙連玉道員趙煥聯
等督兵進剿立將青谿收復兩日之內連破大寨三處小寨十四
處其天柱另股屯匪奪船搶渡亦經各路兵團擊退乘勝攻毀賊
巢剿辦尙屬認真卽著毛鴻賓嚴飭趙福元等軍由貢谿進規天
柱臚如洪等軍會合思州兵練由青谿進規印水瓦寨熊興柏等
軍由平亞橫出爲兩路策應剋日出境會剿務令積年巨匪淨絕
根株以靖疆圉惟楚南兵勇越境剿賊而黔省並無一兵一將會
合兜剿不知韓超所辦何事該署撫以道員擢任封圻宜如何激
發天良力圖報稱乃於分內應辦之賊鄰省尙眈域之不分而本
省則安坐而不顧實堪痛恨著卽遴派得力將弁會合楚省兵勇

將姜逆等股匪實力剿洗淨盡稍贖前愆江忠義前已寄諭毛鴻賓飭令赴黔署理提督篆務此時自難復令赴粵著毛鴻賓卽飭速赴貴州提督署任其鄧子垣一軍著照毛鴻賓所議飭令前進剿賊毋失事機粵匪竄擾陽朔雖經粵西兵勇擊退而首逆張高友尙踞蓮塘老巢該處地僻山深有田有險若不及早殲除終爲楚粵邊患著毛鴻賓仍遵前旨飭令在籍臬司陳士杰記名道趙煥聯等駐紮楚粵交界以剿爲防並著劉長佑飭令派出將弁會合楚師迅速進剿一鼓掃平毋許遷延貽誤將此由五百里各諭令知之○申諭步軍統領等衙門嚴詰姦宄○允直隸添設馬勇緝捕馬賊○以進兵遲延奪福建總兵官林向榮職○予河南陣亡總兵官龔祥麟祭葬世職○己卯僧格林沁國瑞奏擒匪姜台凌等股由舞陽葉縣一帶向西南急趨我軍連日追逐據恆齡等

稟報八月初三日追至裕州之博望驛該匪正圖攻寨我軍趕至該匪馬步萬餘人分隊抗拒恆齡帶隊首先衝入卓明阿揮兵由西北橫鈔突有馬步賊千餘由旁撲來經侍衛隆春壓退北山下復出馬步賊數百名經右翼吉林黑龍江馬隊將此股圍殺殆盡知府祝壇調集練勇隨同剿賊斃匪約三千名餘匪竄入山內我軍馬隊不能進山追剿當卽咨行鄭元善速調步隊入山剿辦至永城迤東擒匪李城趙浩然等股探知我軍分隊西行乘隙糾合各股擒匪竄至永城迤東經富和帶隊迎剿未能得手該逆旋於初八日竄赴碭境勢欲北竄_臣等當派暫革副都統色爾固善統帶各隊追剿十一日行至魚臺縣迤北羅家屯地方追及賊蹤斃賊數百名該逆前股聞信折回拌死來敵並由高粱地內突出步賊數百名我軍先後退下馬隊仍前衝殺詎該逆馬賊見我軍無

多齊由西路將我軍圍在垓心我軍奮力抵敵托倫布諾們不勒殺出重圍陣亡官兵二百餘名受傷二百餘名臣等飛催卓明阿恆齡等馬隊兼程趕回十六日馳抵河南虞城臣等於十七日至城武各起馬隊會齊並經譚廷襄飭翼長海羣帶領本部馬隊三百餘名亦至城武會剿十八日至鉅野縣屬之大義集探得該逆大股在滿家洞一帶盤踞二十日我軍齊隊進剿臣僧格林沁親督指揮令托倫布等馬隊誘賊深入回軍擊之臣國瑞督卓明阿等馬隊斜刺殺入該逆腹背受敵始行敗潰我軍乘勢掩殺斃賊千餘名餘匪翻過山梁我軍越山追剿恆齡帶隊擊其馬賊臣國瑞衝其步賊槍箭齊施斃匪甚多該逆敗退追殺一十餘里斃賊四五千名我軍甫經收隊復由滿家洞迤北之子山集西北突出馬隊賊匪二千餘名向東奔竄卓明阿等帶隊往剿復斃賊千餘

名餘匪連夜南遁向礪山東南保安山一帶奔竄其步賊爲兵團
斬殺殆盡臣等卽飭富和全順卓明阿恆齡等馳往永城相機進
剿李大箇子巢穴臣等卽日帶隊回紫夏邑並咨行譚廷襄將長
清防兵仍撤回竟屬以防教匪其德楞額一軍在蘭嶧剿辦棍匪
尙稱得力見在此股擒匪業經我軍剿盡應令該副都統仍將防
河官兵移紫蘭嶧以資剿辦 上諭內閣僧格林沁奏官軍迎剿
北竄擒匪大獲勝仗一摺所有此次在事出力各員并著僧格林
沁卽行擇尤保奏候朕施恩○諭勝保瑛榮奏官軍途次遇賊接
仗獲勝省城解圍一摺勝保由臨潼督師前進行抵斜口鎮該逆
分股來迎勝保指揮後隊分兩路包鈔更番輪戰賊眾奔潰官軍
追殺二十餘里斃匪不計其數生擒三十餘名該逆向渭北狂奔
大堡三輔行者橋等處回巢悉行洗蕩灞橋一帶賊匪亦聞風逃

通官軍直抵西安省城圍立解勦辦尙屬奮勉在事出力員弁兵
勇著勝保擇尤保奏毋許冒濫○諭議政王軍機大臣等僧格林
沁奏勦辦西竄擒匪並追勦北竄擒匪情形各摺片此次大股擒
匪竄入東境色爾固善接仗失利若非僧格林沁親督各軍迅掃
狂氛則東省地方又遭蹂躪該大臣調度有方實堪嘉尙該營各
起馬隊衝鋒陷陣疊次破賊甚屬得力著於前次發去山西解京
餉銀十萬兩內提出銀一萬兩傳旨賞給馬隊以示鼓勵至此
出力員弁該大臣所稱查取銜名歸入杞縣等處獲勝案內存記
雖係爲慎重名器起見惟該將士等經年苦戰立功不爲不多此
次以少擊眾斃賊至七八千名之多若不量予保奏一次未免向
隅想該王大臣必能仰體朝廷軫恤戎行之意也僧格林沁見已
回軍夏邑其永城李大簡子等巢穴卽著首飭富和等迅速催剿

務拔根株恆齡一軍見經折回東擊其西竄鎮平一帶擒匪若被
楚豫官軍擊敗勢必東竄回巢著僧格林沁相機進剿毋令飽颺
苗沛霖意存觀望經該大臣札飭實力助剿能否恪遵仍著隨時
具奏本日據英桂奏擒匪竄近陝州並於茅津渡上下游搶渡均
經官軍擊退惟兵單將寡請飭僧格林沁派兵會剿等語僧格林
沁大營兵勇徵調四出恐無可撥之兵惟山西爲畿輔右臂且爲
餉源所出見在捻氛偏近河干該處渡口林立防不勝防若得一
旅節制之師直趨陝州與多隆阿一軍會合夾擊俾該匪腹背受
敵不特晉省可以保全卽秦豫亦實獲其福於大局殊有關係所
有豫省防剿事宜及能否派兵會剿之處仍著僧格林沁斟酌情
形相機妥辦將此由六百里諭令知之○諭勝保等奏官軍由臨
潼進省遇賊接仗獲勝一摺逆回巢穴繁多勝保督師進省雖將

大堡三輔等賊巢洗蕩而臨潼之普陀原咸甯之沙河渭南之倉頭王閣村等處爲該匪總滙之所攻剿尤屬不易且涇陽被圍已逾一月更應迅速救援同州一帶兵力過單亦恐不敷堵剿勝保督辦全陝軍務責任綦重自當統籌熟計以肅清陝境爲己任見在省圍已解該逆疊受懲創諒不敢遽行回撲省垣著勝保剋日督師出省或徑攻沙河或先救涇陽務當乘此軍威相機剿辦毋得以居中調度爲詞安坐省城任令外屬居民慘遭荼毒同朝一帶爲晉省西路屏蔽關繫甚鉅節經諭令勝保督兵先顧同朝何以屢次奏報從未提及可見不以軍務爲重但欲急於到省爲自便之計雖諭旨亦若罔聞知負朝廷專任之意著勝保恪遵前旨將同朝防務妥爲布置如稍有疏失或該匪渡河東竄定將勝保從重治罪另片奏瑛棨居心行事不愧賢能請飭幫辦軍務等語

瑛榮身爲陝撫既不能力扼商南遏賊西竄追漢回仇殺又不能
妥爲駕馭一味株守勝保豈未之知若令其幫辦軍務於勝保有
何裨益本日已降旨命雷正綰幫辦該大臣軍務並將甘肅毗連
陝西一帶責成勝保雷正綰督辦雷正綰所部僅畱三營雖由勝
保酌撥一二十人歸其管帶兵力仍不甚厚仍著酌量添調得力
兵勇俾雷正綰得以獨當一面於軍務方有起色回匪扮作難民
由北山圖竄歸化城勝保請飭歸化綏遠兩城將軍及在籍總兵
鄭魁士派兵兜截等語歸綏兩城兵不可用勝保豈不知之鄭魁
士告病在籍復有何兵可派勝保此奏不過豫爲卸責地步本日
業經寄諭德勒克多爾濟等嚴密防範勝保旣膺督辦之責所有
甘肅毗連陝西一帶地方及同朝一帶毗連晉省防務均著妥籌
兼顧毋令該匪乘間他竄致干罪戾雷正綰部下素稱驍勁此次

既膺幫辦重寄惟宜與勝保同心協力通籌大局毋得稍存成見致有貽誤勝保另片一件著畱中將此由六百里諭令知之○諭劉長佑奏官軍收復陽朔及潯州近日軍情一摺荔浦逆匪張高友由蓮塘分股竄踞陽朔經藩司張凱嵩候選道易元泰副將陳有勝等分路攻剿陽朔縣知縣忠慶等督團奮擊該匪竄往高田一帶當將陽朔縣城收復著劉長佑乘此聲威督飭各軍務將高田竄匪迅速殲除忠慶著先行撤任並著劉長佑將如何失守情形查明具奏至貴縣登龍橋等處潯匪附近大墟之龍安嚴等處土匪均著督飭鄭金華蔣澤春各軍力圖掃蕩勿畱餘孽其退泊貴縣鯉魚港艇匪著卽督飭主事梁炳漢等約會各軍迅速剿滅勿令紛竄致貽後患將此由五百里諭令知之○命陝西提督雷正綰幫辦欽差大臣勝保軍務○予陝西陣亡翰林院庶吉士邢

景周祭葬世職○是月蠲緩山東甯海等二十五州縣暨衛所屯莊被擾被災新舊額賦緩徵山西榆次陽曲二縣上年民借倉穀